

A·CHIK GOLPORANG

(Garo Folklore)

PART I

MR. DHORONSING K. SANGMA

PUBLISHED BY

TURA BOOK ROOM

Tura, Garo Hills, Meghalaya

1988

Acc. No. 8700
Class No. Book No. A.L.2
Author Mr. Sangma Shamsing, K.
Title Achik Golporang
Part I

DISTRICT LIBRARY
EAST GARO HILLS DISTRICT
WILLIAM NAGAR

Accession No.

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

A·CHIK GOLPORANG

(Garo Folklore)

Part I

By

MR. DHORONSING K. SANGMA

PUBLISHED BY

TURA BOOK ROOM

Tura, Garo Hills, Meghalaya

1988

Eighth Revised Edition 1980

Ninth Revised Edition 1988

Printed by: M. K. D. Gupta.

Calcutta—(INDIA)

Ja'pang Kattarang	Jak
54. Nire Sinje	88
55. Mongma	95
56. Mese Aro Peru	96
57. Wakso	97
58. Bolgro	98
59. Antisani Salrang	100
60. Bilsini-Jarang Aro Karirang	101
61. Me'mangrangni Chanani	103
62. Kalgra Kalkame	103
63. Guk jo'ongrangni Aro Gipinrangni Bimungrang	109
64. Susime Ma'ani Sia	110
65. Ka'mikkena	112
66. Jongge Aro Tamre	113
67. Danjong	115
68. O-biteaa	116
69. Aganme'apa A	118
70. Aganme'apa B	120
71. Aganme'apa C	121
72. Aganme'apa D	122
73. Aganme'apa E	123
74. Aganme'apa G	124
75. Aganme'apa H	125
76. Aganme'apa J	125
77. Aganme'apa K	126
78. Aganme'apa M	127
79. Ku'jikse	130
80. Sadugittam	133
81. Tongte	135

DIPBLOKMUNG MAKKRE

Changsao dipblokmung makkre ripeng ka'grika-chim. Salsao uamang na'tok makkal dokna ku'mongaha. Re'chakatnasion, "Makkala baosa ripeng?" ine makkre dipbloko singaha.

Makkalde angon badita! ine dipblok aganchakaha. Indaken uamang ripengsa kok ole chibimaona re'angaha. Chibimaona sokna skangan dipblok ripengtang makkreko boltong sote ra'jolchina ge'etaha. Makkreba boltong sote ra'jolangaha.

Mangsonga chibimaona soko a uamang wari tu'a, na'tok bang'ako niroroaha. Wariko man'oa, dipblok ripengtang makkrena aganaha. "Anga chiningchi napangna, na'ara ianon dongsoe angni chiningoni nadobaon, ia boltongchi angni janggilko ka'sne doksobo. Indine agane, dipblok chiningchi napangaha.

Dipblokni nadobaanti makkre janggilo doksobebeaha, Unon dipblokoni gipok gipok dake bisi ong'katenba wari gimikan gape, na'tokrang uko ringoa, bang'en siaha. Unon makkremung dipblok ua na'tokrangko rim'e chimongoa, koksa ong'pile man'aha.

Attamoa uamang na'tokrangko suale ra'enba noktangtangchi re'angpilaha. Ramajoljol makkrede ripengtang dipblokni kamna aiao inmane chanchijoljole re'angengachim.

Makkal doke man'gimin na'tokrangko bon'manoa, makkre an'tang jikgipana aganaha, "Hai, an'chingba da'alde chibimachi na'tok makkal dokna"

“Makkalde baosa?” ine jikgipa singaha. Makkalde angon badita! na'asa na'tok olbana kok balko ole re'aibo ine segipa aganaha.

Makkre kotip kadareke, atte ripee, sosoiget soiget, mese ki'me gol'riket ine ku'smike jikko skang wate chibimachi re'angaha Chibimaona sokangna skangan makkre ramaoniko boltong sote ra'angaha.

Chibimaona sokangoa, wari tu'kala, na'tok bang-kalako niroroaha Chi kosakchi am'doange tu'gipa wariko nikahaoa, makkre jikgipana aganaha, “Anga chiningchi napanggen; na ara angni chiningoni nadobaantin angko doksobo. Angoni gipok gipok dake ong'katjaskal na'ara doksoaibone. Indine jikgipana agane an'tangde chiningchi napangbebeaha.

Segipani agana gita jikgipa segipani chiningoni nadobaantin bil kakket kakket boltongchi doksoaha. Adita doksoon segipani sko brete taning ong'kate chio gipok gipok nikpilaha. Unosa jikgipa dokako dontongaha. Danang! segipade sko brete, sre ong'kate sienba balbopilengaha!

A'gaona gakatbaboaha, mainasa chion jroe rocha-enga? ine jikgipa chrike okamataha. Pilnipil okamoba re'bajanasa, maiban ong'ahama ine chanchie, jikgipa jroange a'gaona saldobaoa. segipani sko brete, sre ong'kate siakosa nikaiaha.

Jikgipa duk ong'bee, grape grape, na'tok ole ra'na ra'bagipa kok balo segipani manggisikosa olangskae noktangona re'angpilaha.

Ma'sichenggija gipinni kamko ja'rikpaania an'targna gimaanikosan ra'baa.

MONGMAMUNG CHIBRIM

Changsao mongma jiksesa badiaba burung dam-sako re'angengachim. Unon uamang chibrim mangsani an'tangni jikgipani manggisiko gope galna ine saksan de'tome ra angengako nikaha. Mongma bipa chibrimko chonnike aganaha. Nio nikrakgija, rim'o man'ragkija mangmangba jiktangko gope galna ra'angnade am-paakonke !

Amjaoba jiktangko sana nisipakugen inesa dak-paenga na'a, ine chibrim aganchakaha, Haida, na'ade anggitamangba daknan amenga amjaenga !

Indinako knae mongma aganaha. Angko chonnika-ma? Angni jikgipa gita mangbongani manggisiko rang-san de'tome gope galbo ine inoba anga mangenchim ! Chibrimni chonnikako man'e mongmade kao nangan gape, chibrimna an'tangko mesokna ine jikgipako waganchi su'e siataha. Unon chibrim gita gope galpana ine an'tangni janggal kosakona gatna ine de'dooa amjaha. De'tomna jotton ka'taitaic nioba amjaha ine nikoa, ua manggisini sambao sintu grape dongaiaha.

Untalsa monginara, Angnade chibriman bilakbata ine chibriinna kenna a bachengahana. Unu ganinsa da'ona kingking mongmanang jeko cha'oba, chibrim dongengnaba donga ine kenchake, dokchichie gochichie galchengesa cha'a ine Achikrang agana.

Biltangko nichenggija gaora de'na nangja.

ABISA A-BA TUA

Walsao Noremung Chire abisa mina a'ba tuengachim. Uamang mikrake dongna manna gita gongminako doke roengachim.

Gong gegong ang'ke grong, gegong,
Bil'ik kambe gongritong, gegong,
Den'na dako tapritgong, gegong.
Mia Misi rimitak, gegong,
Ang'ke ja'si ja'ritak, gegong.

Matcha iako knaenba uamang'ni turam borang kokkimao dimrim dimrim dake chrokeaha. ku'nengana gongminako dokgija dontongode, matchara uamang abisako chike cha'na ine borang jang'kiko rikkak rikkak ine maldoangaiachim. Una gongminako dokattaiode, a'china ong'onen matcha chroktaiachim. Uni gimin uamang abisa bodol bodol gongmina doke on'chaen, neng'amung kenamung amchakang piljaengahachim.

Abitang Nore nogipana aganaha, An'ching matcha-
oni jokna maiba chol mingsasikkode dakna nanggen
Indine nogipa Chire gongmina doke on'mitingo abi-
tang noksik nokbak am'e nioara akkaru mina rongsako
nikenba, uko chu'dapo gope, ua minkujana kingking
gongminakon bodol bodol doke on'angkuaha. Akkaru
minaha ine nikahaoara nokdechol gita a'achi uko
galonatenba, rang'san, Aiao angdede! nono, aiao
angsade! abi a'achina ga'akangjokke ine chrika dak
tokaha. Maisa nono chaboda! Haida! abi re'boda!
ine grapa skima dakaha.

Unon matcha mande ga'akbabebecha inc chan-
chienba rang'san chagrope akkaruko chikkropaha.
Akkaru ding'beani gimin matcha ku'sik gimik kamako
man'e mikowel'wele riaha. Indakesa uamang abisa
un walo matchaoni jokaha.

*A'sel ong'nasion sintiaigija jokani cholko am'na
nangchong'mota.*

CHIPU NA·KATOK

Changsao pattigipa ra'rongipa pilak chipuranko
okamattoke, mangantinan kraa gita bisiko suale antie
on'tokahachim. Chipu na'katokba an'tangna sualgimin
bisini bakko rac songtangona pil'angengachim. Ramao
ua chibima tipchangao na'tok bang'beako nikaha. Ua
namen mikbokbeenba bisitanko an'chengone done
na'tokrangko chaaha. Ua na'tok bang'ani gimin cha'e,
suk ong'en an'tangni bisi donakode gualpilaha.

Indakmitingo chi-kosakchi mikka jimbee waani gimin
chi rang'san dal'bae, chipu na'katokni bisi donako
banpakangaha. Ua bisiko chi-ka'machi donggipa na'-
senchi, gomon, gagol, magulrang cha'sotokaha. Indak-
esa uaranga bisiko da'ona kingking man'tokaha ina.

Cha'man ringmanosa chipu na'katok noktangchi
re'pilna ine an'tangni donanggimin bisiko am'aha,
indiba man'jaha. Ua duk ong'beesa jakari noktangchi
pil'angaha. Indakesa bisi dongja ina.

Mikbokachi manderang man'giminkoba gimaatranga.

DO·UANG

A'chik pagitchamrang do'uang mikoana kena ; maina do'uang mikooode mande sia ine uamang beber'a. Uani gimin indake aganani gnang. Do'uangara nawangmung me'mangni rama cholbibrao nokpante jamsirenge dongachim. Sigimin manderangni janggirang ia rama cholgnioni cholsasik gita nawangni songchi, ongjaoba me.mangni songchina, re'angna nanga ine A'chikrang beber'a. Indake pilak sianggipa manderangni jama janggirang ia do'uangni nokpanteko re'paknan nangaiachim. Ia nokpanteko re'pakangmitingo uamang pangsona srak srak ine nangbake re'na nangachim. Ia gam'ako knarike do'uang, Sani se, sani jik, sani de, sani sa'a brangbara rimebo salebo wai ? ine aganwatatranga ina Uan an'chingni ouang ouang ine mikoako knaronggipa do'uangni mikorongan onana.

Ian do'uangni mikobewalsan ong'aioba, A'chikrangni da'alona kingkingba beber'e kenengpiti. Uko basakoba basakoba do'memang ineba minga.

Kragija beber'e kenaniara gokarangni kamsan onga.



SENG·WATMUNG MAKKRE

Skang chasongo seng'watmung makkre ripeng ka'grike, duk sukni salrangoba, dakchakgrike rogrik re'grikrongachim.

Salsao makkre ripengtang seng'watko migital cha'e roechina okamataha. Uni gimin seng'watba an'tang

jik dedrangko rimbite ripengtangni nokchi re'angaha. Makkre ripengtango wak matchu doke, chu mi on'e cha'at ringataha. Salgni walgni cha'a ringani ja'mano seng'wat noktangchi re'pilna chanchiaha. Indiba re'angna skang, ua ripengtango an'tangchi basakoba migital cha'eskachina aganangaha.

Seng'wat noktangchi re'na re'chakaton walang-engahani gimin ripengtang una bilchamko tarie on'ataha. Indiba seng'wat aganaha, bilcham nangjawa, ripeng, angon bilcham donga. Re'nahane ripengne ine agane, salam ka'e an'tangni ki'sango donggipa wa'alko ching'ate re'angaha. Makkre uko nikrike aiao inmanaha. "Maikai ripengde ki'sango wa'al kabite re'na man'a bia," ine ua chanchie dongrikaha.

Manchia sal sokon, makkreba an'tang jik dedrangko rimbite ripengtang seng'watni nokchi re'angskaaha. Seng'watba an'tang ripengtangna wak matchu doke, mi song'e, chu cheke on'soaha. Uamang salgni walgnina kingking cha'a ringaha.

Cha'jok ringjok, ripeng, da'ode chingaba noktangchi re'naha ine makkre aganaha. Atcha ripeng re'angbo, indiba da'o walangaha; bilcham so'e nate' re'angbo," ine makkrena aganaha. Wa'al nangjawa na'a ripeng, angon wa'al donga ine makkre agane jik dedrangko rime re'angaha. Adita re'angon andalahani gimin ramakon nikangja'engahachim. Uni gimin makkre ramao saniba mi song'e cha'angani wal'kiko ra'e ripengtang seng'watni daka gita an'tang ki sango kabite ki'sangtangko gong'get gong'get dakate re'angaha. Dikdiksa

re'angon ki'sango wa'al kamakon chakna man'angjajok ;
indimangba saknaako chakchiken re'angdrakuengachim.

Indaken chibima damsako batsotna nanggipaona
sokoa saako amchakjae chio asongsimaha. Unikoa
wal'mindik, saako chakchike, grapsi mikosi dake nokona
jenetene soke, ki'sangtangko nioa, ki-sangde kamret-
retan bon'jok. Indakesa da'alona kingking makkrerangni
ki'sanga wa'al kamani gita gitchaka ine agana.

Ar'tangni bilni nalsachiko dakdraode duk man'a.

DO·KUAMUNG MESE

Skang chasongni salrango, a'o malgiparangmung
sako bilgiparangni gisepo mamung bobil ong'grikani
dongjachim. Indaken salsao do·kuamung mese ripeng
ka'grikna ine ku'monge ripeng kagrikaha.

Salsao uamang meseni nokgil sreko damsan
romitingo tik nigrike kni chitgrikna ku'mongaha. Do·kua
mesena aganaha, ripeng angko skang tik nichenge
kni rokchitchengbo, intango nang'ko dakatskana.

Meseba ripengtangni agana gita dakna kusi
ong'aha. Ua ripengtang do·kuako tik niate, topilate,
chirengbitbit dake, kniko rokchitataha. Aiao nitobejok,
ripeng ! Saoba saobarangde nangnade mikchapilgnok
ine etale roaha Da'ode angko tariatskabohade ripeng.
ine mese aganaha.

Ra, angchi janggilate asongboda ine do·kua
aganaha. Unon do·kua aratenba, meseko tik niata, kni

rokchitata dake, kniko reprepe donate aganaha. Ripeng na'aba nambejok; kni saakosa kni ro'batroroa ina. Uni gimin anga nang'ni kniko sakataha, ripeng ine do'kua aganaha.

Mesede do'kuani tol'akon bebera'e kusi ong'e gol'getget dakakon donpaijok Indakesa meseni ki'meara da'ona kingking gol'getget dakaijok ina. Indiba do'kuade meseni name tariahani gimin da'ona kingking chi-jengbitbit nitoe donenga.

*Ripeng ka'grikoba kakket ong'grikosa namgniko
man'grika.*

NONOIMUNG CHENGGARI ABISA

Mande saksao demechik sakgni gnangchim. Uamangoni nogipako Nonoi, abitangko Chenggari mingachim. Uamangni ma'a paa siangahachim. Abitang Chenggari nogipa Nonoina ka'sae dakrongbrejachim; indiba nogipade abitangni kattako namnikbeachim.

Salsao abitang Chenggari misi ake, jo'e su'e song'e rite, donsochina nogipa Nonoiko ge'etangaha. An'tangara a'brengchina a'a gamna re'angaha. Uamang abisa a'dalo dongengachim. Je misiko abitang ake su'sochina aganangaha, ua misiara ong'pokpok-aiengpitichim; maina unomiting misi ong'baani salsa ong'aiengpitichim.

Nogipa Nonoi abitangni ge'etanga gita misiko kera'a ake nakaha. Nakmano jo'tokenba, su'e choe

nioara, misi birongkon rongsaba man'jaha. Pilakan cha'che ginde dakesa tang'pronge katangaichim. Nogipa namen jajrengbeaha. Ua sa'samsako choe nitaioba, misi birongan dongjachim. Uni gimin cha'che ginderara ong'oba, abitangna kene ukon song'e donsoaha. Mi bijakko sacate donangenba. an'tangde anjole chi ko'jolna chidarechi re'angaha; maina salba da'o napangahachim.

Nogipani chichi re'angmitingo abitang Chenggariba a'brenghchini sokbaaha. Nogipa misi ake song'soama songsojama sandie nioa, misi bidang aro misi jo'e su'ani chinrangko nikaha. Una mi cha'na ine mi bijak saangako onggarioniko ra'one nioa, cha'che ginderarakosa nike namen ka'onangbeaha. Chenggari Nogipako an'tangde misi birongko song'e cha'e angnasa cha'che gindeko song'e donsoaha ine chanchie, Da'mo re'bakuchina ine chingsoaha. Indiba da'nang l indakede ong'pajachim; maina misi birongan dakkujachim.

Nogipa au miksue chiko kokchengo ole nokona re'baaha. Chite onsrappijan, angara wakma angna cha'che ginderarako song'e donsoara? ine abitang saienba, salruru salmitale am'bol jangnangchi nogipako dokbeaha. Nogipa pilak kattarangko graptaitaie aganahaoba, ua bebera'jaha. Na'an cha'tokaha, skal, ia nang'ni song'akoba na'an bon'e cha'tokbo inenba nogipako uni misi song'soachin golekaha.

Angaba cha'ja abi, na'a namnikode jaktangchi ake su'e nibo ine nogipa aganaha. Indiba abitang bebe ra'jachim. Uni gimin nogipa duk ong'an chakna dongna amjae, abitangko aganaha, abi, na'a angni

aganako bebera'na amjaode, angni okko raprake nibo. Unon angni oko misi dongama dongja na'a nikgen ine nogipa grape aganaha.

Abitang nogipani kattako bebera'jan baksa ka'onangan amchakjae, nogipani okko ketalichi rat-ponge niaha. Da'nang ! ua nogipani oko mamungkoba man'jaha.

Unosa Chenggari, aia, gose ! nonoa, cha'pajachim ! ine skime nono wai ! wai ! nono ine grapaha. Untalsa da'ona kingking Chenggarirang misi ong'kari minkario, nono wai ! nono wai ine mikoronga ina. Saoba l.onoiko rim'e niode ok rapongani pariko nikgen.

Ka'onangako rang'san chu'sokatna nangja.

DO-PO DEBAA

Bol pangsao apingga ma'ningsa ba'e grang ki'me tarie roengachim. Unon bachiniba do'po mangsaba bilbae, uarang baksa ba'e roepaaha. Do'po apingga bi'sako nike namen namnikbeaha. Aiao nang'ni bi'sa ba'ade ba'nang chi'nangbejok, da'nang ! mikterokrok. ku'bandikdik. simchirengreng, ba'e ropanagitik, rime kal'aknagitik dakaia, da'nang. Maiko cha'e, maiko ringe, indake name ba'na man'tokasai ? Angni de ba'paasai ! Bilsisao ba'paaba mikelonglong, bilsisao ba'paaba miktinggakgak dakakosa ba'manaia ! Na'ara mainasa nambee ba'pajajok ? ine apingga aganaha.

Mikkang bilsiode angaba, ba'e ra'panagitikan, rime kal'aknagitikan, ta'ma mikroka gita, geda giloka gitasa ba'skagen inc do'po apinggana aganchakaha. Bilsigipinoba apingga, do'po aro uni bi'sarangko niketaiaha. Maisa do'po, nang'ni de ba'ade da'oba skang gitan mikelonglong, miktinggakgak dakaiakc inc apingga ka'dinge roaha.

Oe na'a, adatang abitanrang angni dongjamitingo mikilrangko okreke rotokenba mikronkon chonatna man'piljae apsan ong'ataitaijok inc do'po apinggana aganchakaha. Kari bilsisoktaicsa namprete ba'srang-aignok inc agane, do'po kratcha'e apinggaoni bilc katangaha. Bilsianti karianti bi'sa ba'taitaioba, apsan ong'aiani gimin do'po apinggana, do'orangnan kratchac salo salode bolkolo, bolgrimo, dongnue walo walosa ong'kate cha'amaiaha inc agana Untalsa da'ona kingking do'porang salo ong'katgija walosa ong'kataia ina.

*Kamtangko mikkangchi nambate daknok inc aganeba
apsan namgijako daktaitaiakon, do'po deba'a
gita inc aganronga.*

DO·DE GITOK

Skangode dipbloka janggil ripugija aro sre mindugija nitobeachim inc agana. Indaken salsao dipblok Misi Susimena. Saljong Bearimako ma'a paa dakna inc Misi Susimena, Saljong Bearimani songchi re'angaha. Sokangoa ua an'tangni mangsonge re'baaniko uamangna

aganaha. Misi Susimema. Saljong Bearimaba kusi ong'en ra'chake wak mangsni, matchu mangeni doke chuko, miko salsni walsni cha'dil ringdilaha. Ringa cha'a matchotman'oa dipblok aganaha. Ama Susimema, Saljong Bearima na'simangba jagital jatengrako te gisim angal so'ode angni nokchi jamchiba roange doange niskabone. Indine agane dipblok songtangchi re'angpilaha. Dipblokni manchia sal sokahaon Misi Susimema, Saljong Bearimaba dipblokni songona re'baaha. Dipblokde an'tang nok jam, cha'na ringna dongpajani gimin kratcha'e, jaksi chike a'kolo nape dongnusoaha.

Misi Susimema, Saljong Bearimaba dipblokni songona sokange, O angde dipblok, O angsa kakkapru ine okamaha. Pil'nipil changni chang okamoba dipblok olok olok inesa a'koloni aganataiaha. Uni gimin Misi Susimema, Saljong Bearima ka'a gape, bika cha'e, da'ontal na'a janggil ripuaigen, sre minduaigen ine sao on'e re'angaha. Undipetsa da'ona kingking dipbloka janggil ripua, sre mindue ku'mangija gita dake ku'rang gama' ine agana.

*Dipblokni kam gita dakakon gipinchi do'de gitok
an'tangchi ki'sing gitok ine manderang aganronga.*

SADUSA MA'DRANG SAKBRI

Skang chasongni salrango anti cha'ani biaprang namen chel'beachim. Badiaba songrangoni anti charam biapona salbri salbonga dake re'na nangachim.

Changsao badiaba songoni sadusa ma'drang sakbri Toja Geja, Minja, Doja minggipamang antio palna gita adita bosturangko koko ole antichina re'ongkat-angtokaha. Uamang salbongana kingking re'ange, anti cha'ram biapona sokangaha. Bosturangko pale man'gimin paisarangchi do'o, do'gep, do'bokmung aro ma'manti bosturangko bree songona re'batokpilengachim.

Rama re'bamitingo kosakchi mikka jimbee waahani gimin chi dal'kimongbaaha; Uamang dal'amung tu'a-mung ta'arakamung dakgipa chibima dilsako batna nangachim. Jal'ang dongjachim. Maikai batgen chanchigrime nion cholkon nikjaengachim. Sadutang dal'batgipa Toja aganaha. Hai an'chingni jilna ra'bagipa' do'geprangko chio watatchenge nina. Do'geprang batangna amama amja nichengna. Do'geprangko mripjaode an'chingba batna man'pagen ine aganenba do'geptangtangko kacharagoniko watattokaha. Do'geprang kusi ong'bee jroangtokaha.

Uko nike sadusa ma'drang sakbrian, Aiao chiara ba'sranga, do'gepkon mripja ine agane, kusi ong'e koktangtangko ole chibimako batskelangtokaha. Chiara ba'bea ine chanchie simsakgija re'angtokaiahani gimin chi uamangko mriptoke, jroe katpanara changtokpajae sitokaha.

Gisik grini kamara sianiko grongninga.

KU-SIMPEL BA MATCHA

Skangni manderang bl'sa atchion manderangko siatna man'gipa pilak ma'malrangan, sani palo ga'aka uko uina gita atchichakgipa nokni nokkimachi amra ansoa, re'chu chaksoa ine bebera-achim. Mandeko dokode, atchichengon mongmani anchakgipa re'chuo ga'akea ine bebe ra'achim. Indakeba maibani jakchi siode, uni amra anao re'chu chakao ga'aka ine inachim.

Changsao Chireni segipa Geng antichi re'angenba, anti cha'mano songtangona re'bapilengachim. Indiba songona sokgijan walchange, rama sambao donggipa giting ja'pango waltuaha. Adita walingangon maiba maibarangni birangko Geng knaaha. Indiba bachi maichongmot ma'sijachim.

Un walo me'chik saksa demikkang niknasiengachim. Uni gimin pilak siatna man'gipa ma'malrang amra anna re'chu chakna ine ku'monge re'angtokengachim. Mapil mangsaba amra anpana re'chu chakpana ine Gengni tuenggipa rama gita re'pakbaaha, Mapil giting bolo sing'aha. Na'ade saksa me'chikni demikkang niknasiachi amra anpana re'chu sachakpana re'angpajama ?

Giting bol aganchakaha. Angade re'pana man'jawa; maina angu sokgipa gnang, uko gale angade re'angna man'jawa Indiba ka'sapae angni amra re'chukoba anchakpakande ra'angpabo. Re'bapilon sani amra re'chuo ga'akaha, ia gita re'bapile aganpakangpabo ine giting aganaha.

Pilak ma'malrangan demikkang tukgipani nokkimachi an'tangtangni amratangtangko anchak sachaktokaha.

Bi'sa atchion, ku'simpel ba matchani amra re'chu chakao ga'akaha indake pilak re'bagiparang songtang-tang noktangtangchina re'pilangtokaha. Mapil giting bolni dongram gita re'angbebeaha. Ku'simpel ba matchani amra re'chuo ga'akaha, ine mapil giting bolna aganaha. Demikkang nikgipara sani jikgipa ong'a? ine giting sing'aha.

Gengni jikgipa Chirc ine mapil aganchakaha. pilak kattarangkon giting bolni japango dongenggipa Geng knatime dongengachim. Giting bol uona sokbagipan Geng ine uijachim Geng gisiktango aganaha. Anga mamung dakeba depanteko ku'simpel matchana on'jawa. Da'ode anga pilak ong'nirangko taltokaha.

Geng walgimikan tusinapjaha; ua chanchiari wal seng'akosan sengsoaiengachim. Walsimsim dakmit. ingon Geng nokona re'skelangaha Ka'sne re'ode ramara salsani ong'engpitichim, indiba Geng ua ramako salbelasanon sokangaha. Geng nokona sokange, ramao tumitingo an tangni knagimin pilak katarangko jikgipana agane on'etokaha.

Depante maikai ku'simpel matchani jako gaakjawa, ndake ua an'tangni nokko duulsrange wa'a bolrangchi mitapsnina kingking guare kadule unoni ma'akoba dekoba a'palchi ong'katna ongija bilsi chi'gnina nokningon rakiaha. Salsao pagipa depanteko chidareo aue rochina ine an tangan mil'am sepi ra'e skang dile re'dilangaha. Depante chidareo suk ong'e aue romitingo, pagipa gisik rakbeen nitimsoaha. Au miksumano depante ba'ra gansreaha. Nokchina re'pilna

inc re'chakatagon ku'simpel matcha wa'panggopo timsoe depanteko chagopaha. Pagipa uko rangsan niksoe, sepi chake den'soaha. Ku simpel matcha ramao ga'ake wagam wakengsi dake siaha.

Depante bobilni jakoni jokahani gimin, pagipa kusi ong'an amchakjapile depantena aganaha. Baba, an'chingni bobilko da'o amahani gimin ku'simpel matchako ga'tingdate goera de'bo. Depante pagipani ge'eta gita ku'simpel matchako ga'tingdate, Kai, goera ! ine aganaha. Depante mamung nichenggija jeramram ga'tingdataha. Unon depante matchani wagamosa ga'tingdatmanc ja'pao matchani wagam busoaha. Indaken ka'sne ka'sne hisi chipang' algnini ja'manon ua siaha.

Gaora de anlara dukkosa ripeng kasikara.

KAWATE KU-DIKGILA

Salsao kawatte mangsa cha'amachini noktang a'kolona antangko romrome re'baengachim. Kawatte antang be'enko kom'totchengesa romrome re'rongachim. Ua ramao matcha mangsako grongaha. Matcha kawatteko chike cha'na sike uni kom'tote romrommitingo chagope chikaha. Indiba kawatteni bigil rikkap rikkap dake rakbeani gimin uko chikna man'jae watpilaha. Maidake chikode man'gen anga? ine on'tisa re'jite matcha chanchiaha. Indiba ua chike cha'ani cholkon uijaha.

On'tisa rurutani ja'mano, an'tangko chike cha'na man'jae matcha katangaha ine kawatte chanchie aganaha, "Matchan goka! Okglaji bangji, ukkurio bubari", "chong'motan angko chikna skode, bia angni mitalmitingo ka'bako asongjetesa chikpabo, rakgipa janggilchikosa chikpilajokona baoni man'pana!"

Ia kawatteni agana kattako k'nae matcha kusi ong aha. Atcha, nambejok! an'tangko chike cha'na angni uijaengako uiatjok ine matcha gisiktango chanchiaha. Ua kawatteni kom'tote romromako dikdiksa sengkuaha. Jensalo kawatte kom'tote romrome mitaltaiaha, ua bildape ka'bako asongjete chike cha'bebeaha, Untalsa kawatterangko matcharang chike cha'na uiaha ina.

An'tangni krat'cha'gni ba signi kattarangko aganjojoe ja'mano krat'cha'ani ba sianio ga'akgipa man'dekon kawatte ku' dikgila ine agana.

MONGMAMUNG OKUPU

Changsao mongma mangsamung okupu mangsa, mongmara chi ka'mao, okupura chi kosakchi chibima dilsao, auengachim. Okupuni auatani gim'in chi ka'machi kimongangaha. Chi kimongbaako nike mongma gisiktango chanchiaha. Aiao! sawa chonnik onnik chi kosakchi audape chiko kimongatengaha? A'gilsak gimiko angan dal'batgipa aro bilakbatgipa ong'jama? Angko Sawa indake chonnikna pa'soka? Nachil sal-dengdenge watata man'gen biade.

Unon mongma ka'onange chrike inataha, Wai, sawa audape chiko kimongatenga? Chi-kamao anga, mongma, auenga ine uijama? Okupu aganchakaha, anga nangna mongmana batskagipa; nangna kniding dingsaba mogijagipa, anga audapatenga. Angni sepangona re'babo, nachil pe'rokroke watatna. Indinako knae mongma kena gnang aganna a'bachengaha; Aiao! a'gilsako angan pilakna bate dal'batgipa bilakbatgipa ong'achim. Indiba angna batskagipa maia bima dong-engpitisai! An'tangni uina skako dontongna man'jae mongma sing'ataha. Indide na'ara sawa, mai minggipa? Anga nangna batgipa, pilaknaba kengijagipa a'kol bite donggipa ine okupu aganchakataha. Angni bil aro bimangko uina skode, iakai, anga angni kimil chonbatgiparangoni dingsako balpakatenga. Indine okupu an'tangni bu'su ge'sako oke balpakataha. Uamangni je'grikako gipi wakangpade nie dongengachim.

Mongma okupuni kimilko niksoarion rang'san kena ong'kate be'en mopile aganaha. Habab! ian chonbatgipa kimilsa ong'ode, dal'batgipa kimilde baditan dal'enggen! Uni bimangde pangpang baditan dal'sranggen! Da'siba anga ku'rangko knaarisan bimang chonenggen inc ra'bie ropaengjok. Hat intango ka'onange angko dokbebeode, angkode bekining biripik nikjawaha. Uni gimin katon janggi jokpakugen ine chanchie mongma kime songgetgete nipil nichagija, ga'aktaitaie romromtaitaie katangaha.

Uko niki gipi wakangpa, Jara mongmade dal'mangmangaia, okupuni togie kimil ine bu'suko on'atakon

bebera'e katangaha ine aganrike ka'dingrikbeaha. Mongma jarara banona katgen bia ine niwatoroe ka'dinge gipi wakangpa ja'rikangaha. Ua ka'dingani giminan mikron nikjapile, rong'brako chagake, su'kimpeka gita ga'ake ka'machini chong'gni aro kosakchini chong'gni wagamsan dongari pilakan be'tokaha. Ku'chilba ku'grekgrek dake tangskikaha. Untalsa da'ona kingking gipira ku'chil nipgija wagam chongbrisan dongaiaha. Unbaksaba agre ka'dingbeahani gimin mikronrangba chonchonjolangaha.

Gipinna agre ka'dingstekode an'tangna ong'pila.

MATCHADU MATCHABET

Skangni chasongo matchadu matchabet minggip-ara, salode mande walode matcha pil'gipa badiaba ma'chongni manderang ong'achim. Uamang salode manderangni songrangchi re'ange, mandeska gitan golpo ka'e ka'dinge rorongachim. Indiba walode matcha pil'e manderangni do'o. do'bok, wak, matchu jillarangko chike cha'rongachim. Matchadu matchabetrang songsa jamsa ong'pilahachim. Uamangon sepangjolni manderangni jillanirangde bon'pilahachim. Uamang salgni salgittam re'na nanggipa songrangchinaba gisep gisep re'ange, manderangko siatgija rim'e ra'baenba nokkimatangtango wakko, do'ko gita jille cha'rongachim. Indakani gimin songni manderang namen jajrengbeaha. Mitam Mitam songni manderangde nokko jamko waten

song chel'arangchi katangpilaha. Indakako nike Abet minggipa mande saksu chanchibeaha. Ua maikai matchadu matchabet songgimikkon so'ote galna man'gen ine cholrangko am'beaha. Abet matchadu matchabetrangko so'ote galani cholrangko chanchien chanchien bon'kamao mingsa cholko dake nina mangsongaha.

Salsao Abet te'rik malbok mingiminko palna ine koksa ole, matchadurangni songchi re'angaha. Matchadurang niksoarin Abet maiko olbara? Abet maiko olbara? ine agane nina chabatokaha. Bol biterangkoba na'simangba cha'pana skamade? ine Abet aganaha. Nang'ni cha'na on.paode cha'pagenchim ine matchadurang agantokaha. Abet matchadu sakprakna rongprak dake songgimiknan tike suale on'tokaha, Matchadurang an'tangtangni palko cha'e nioara namniktokbeaha. Uamang kusi ong'tokbeaha.

Abet nang'ni songode indakgipa biteara bang'ama? Bipangara bolma budu? ine matchadurang sing'aha. lade bol bite bipangde dal'amung dokroamung daka, indiba ritchengbea ine Abet aganchakaha. Na'simang namnikode anga bol gimikkon den'pee on'na man'gen, indiba na'simangsa dakchakpana nanggan. Na'simang songgimikan ang baksa re'e biterang bnekjana gita bolni be'bamitingo uko rim'chaksotokode anga na'simangna den'pemangmangede on'na man'gen ine Abet aganaha.

Na'a den'pee on.paode chinga rim'chaksona man'gen ine matchadurang ku'rachaktokaha. Abet

matchadu songgimikkon songtangona rimbae, bolchu bolma duul mik kolgrik ong'gipako salsnina kingking den'peaha. Bolchu bolma be'angmitingo Abet aganaha. De, da'ode na'simang gimikan rim'chaksotokboha. Unon pilakan chro chro jakrangko songdoe rim'chaksotokaha. Indake matchadu songgimikan bolchu bolma be'jete sitokaha. Da'o songni manderang matchadu matchabetrangna kenaoni jokahani gimin Abetko mitelbeaha.

Namgniko dake on'giparangni bimungrang sioba tanga.

GONGGONGSINGMUNG MAKKRE

Changsao gonggongsingmung makkre do'ona atta sana ku'monge burungchi re'angaha. Ramao makkre gonggongsingo, attara baosa ripeng? ine sing'aha. Attade angon badita! ripeng, ine gonggongsing aganchakaha. Indake uamang re'anguaha. Re'angmitingo gonggongsing makkreko boltong sote ra'jolchina aganaha. Uamang atta saani biapona sokahaoa, gonggongsing makkrena aganaha. Anga atta saegen, na'ara ia bol mitino dongnue do'o nange ga'akbagipako boltongchi doke chimongsobo. Gonggongsing bolchi gakatange, chikareko nione, a'gitokko nisote an'tang okningoni bisringko bikote bolsaoni bolsaona, cheksisaoni cheksisaona, sringbatroroangaha. Ripengtangni daka kamko nike makkrede aiao inmanpil-engachim. Dikdiksani ja'manon do'o bilbae saanggimin attao

nange ga'akonbabebeaha. Makkre do'o ga'akbaa ga'akbaako boltongchi doksoe bol ja'pango chimongsoaha. Ua salo uamang bang'en do'oko man'aha. Attam salniahaoa do'o man'giminrangko suale uamang noktangtangchi re'angpilaha. Adita sal ru'utani ja'mano makkre an'tang jikgipako do'ona atta sana mong'aha. Attara baosa ? ine jikgipa sing'aha.

Attade angon badita ! ine makkre wakichengcheng dake kadinge aganchakaha. Ua gisiktango gonggongsing gita dakatpaigen ine chanchiaha. Indake uamang jiksesan burungchi jikko skang wate, atte ra'e, kotip kadoreke re'angaha. Atta saram biapona sokoa, makkre boltong sote jikgipana one aganaha. Angni saanggipa attao do'o nange ga'akonbagipako doksoe bol ja'pango dandake donsobo. Unikoa makkre a'gitokko batsote, chikareko nione bolkambechi gakatange, ripengtang gonggongsingni daka gita, okningoniko atta bikotna ine an'tang okko raponge, bibikko bikote bol cheksio ka'enba, bolsaoni bolsaona bilroroe sringangaha Bibik bon'ahaoa makkre a'aona ga'akonbaaha. Bak dib inana atta saangao do'o dal'a nangen ga'akbajok ine chanchie jikgipa boltongchi joljolari re'ange dokeaha. Ja mano name niora uan segipasa ine nikaha. Segipade sisrangaha. Jikgipa grapmanggasiae, sinti do'pilgime, noktangchi re'angaiaha.

*Pilakko dakna skangba mikkang janggil name
nichengna nanga.*

PANINGSA

Pekda minggipa mandeo depante saksa gnangchim. Uni bimungko Gongsas mingachim. Gongsas jik kime nok dingtang cha'ahachim. Salsao uamang paningsa ni brena kok ole a'jong songchina re'angaha. Miko bree songtangona re'bapilmitingo, uamang bol ja'pango neng'takaha. Depante chi ringna sike neng'takmitingo chiko am'angaha. Ua pagipana aganangaha, anga chi am'e ringekuna, na'a neng'taksobo. Pagipa kusi ong'en watataha. Depanteni ru'utbaon pagipa chanchiaha. Anga da'o on'tisamang miko man'dapodechim. Indine ua depanteni kokoniko jakwakgni migilko chin'e an'tangni koko donatskaaha. Depante manung ra'ani chinko uijana gita namedake tarie donsopilaha.

Depante re'bapilahaoa, ua pagipa uni miko chin'e ra'soaha ine mamung chinkoba uijaha; maina ua indake dakgen ineba chanchichipani dongjani gimin mamung simsakaba dongjaha. Adita neng'takani ja'mano uamang songona re'baaha. Bilsa bongani ja'mano pagipa sae siangaha. Gongsas pagipana matchu mangbrimang den'ate ganchi rike so'e galaha. Unikoa kima sol'e nokmikkango songe donaha.

Gongsas an'tangni songni sepango donggipa chibima rikamo bari damsako dake, uno baring, ja'lik, ta'marang aro adita cha'anirangko ge'aha. Ua mandarangni dakronga gita, matchu sigiminni sko bikrokko ra'bae, bari jatchio go'ol songe sikroke donaha, Pringsao songsulni me'chikma saksa Gongsani bari-

oniko sriksrik baring akna ine re'baaha. Baringko akna ine dangtapon, matchu sko aganaha, wai, na'a maiko dakna sienga? Ia baride angni depante Gongsanisi. Na'a cha'una nangja. Nibo! angaba tangmitingo angni depante Gongsani miko jakwakgni chin'en angko uni matchuo atchiate bilsisnina kingking matchu ong'e gamataha. Anga da'o matchu ong'en sipilaha, indiba uni groan matchotkujani gimin angko da'oba bariko dongtimatkuenga ine aganaha.

Iako knae me'chikma kratcha'amung kenamung dake Gongsani nokchi re'ange, una pilak katarangko tale agane on'eaha. Pilak katarangko knatokoa Gongsagrape, matchu skoko ra'bae, ganchi rike so'e mangon mangsenge kema ka'aha ine agane watataha. Nangni ka'sae watahaode, anga re'gnok angde ine jumangchi pagipa agane re'angaha. Tangmitingo cha'u me'puode, simanoba me'mang a'songchi re'angna mang'ija matchu, wak pil'e groko chotskana nanga ine A'chikrang bebera'a.

Na'a cha'unabe.



DIMRE ME-CHIK

Gitim damsao Dimre minggipa me'chik saksa gnangchim. Ua mamatang, adatang, noska, abitang, nio sari, songsul nokripengrangkoba mande mingja'chim. Uni idake dakani giminan ma'drang gimik aro songgimikba namnikjae uni noko rogija gagija gal-

chiptokaiachim. Adita bisirangni ja'mano segipa siangaha. Segipani ma'kinga nawang charongachin. ba mangcharongachim. Dimreni badkrang segipa nawang chachong.motgen ine uisoenba, Dimreni pilak gamsengko, atte gitchi pilakkon ra'e kattokenba. Dimrekodc segipa baksa nokon kachipchange donangaha. Rua achok mangsa aro ketal bi'sa mangsa mangmangkosan donangaiaha. Salgni donani ja'mano segipa mangchana a'bachengaha. Uko nike Dimre ma'drangko aro songsulrangko okame okame grapaha. Indiba saksaba knachakjaha batesa, gitichichina ine intekataiaha.

Dimre rua achokchi wa'seko grapang den'pruang dakaha Se sagi mangchae chonggrimgrim dake asongenba, maina wa'seko den'prue roenga bia? ine inataha, unosa ua bate bate gripe okamaha. Indiba saksaba uko dakchakejaha. Graprroe salgimik den'pruachi an'tangko napgnok ine nikoa, chokonprue katna dakako segipa nawang rang'san knitomo rim'rikaha. Indiba jikgipa an'tang kniko ketalichi rasote jenten jokange, mande jinmachi katangaha. Segipa nawang jikgipaoniko man'rikgipa kniko ku'bol ku'bol cha'enba, E'ching e'ching, rasin rasin similachim danang! ine aganrikaha, Jikgipani ja'mano song nokginikon so'chipe galeaha.

*Nammiting Salrango ma'drang bakdrangko aro songsul
nokripengrangko name donggrikna nanga.*

DO PILGIMMUNG DO-MESAL

Badiaba songsao do·pilgimmung do·mesal bima mikcha-namnikgrike kimgrik-donggrikaha. Pilak kamon uamang jik jikna krae se sena krae mande ra'grike ka'sagrikachim. A'a gamoba, anti a'king re'oba, damsan damsan ku'mong nangrimgrikesa re'a roachim. A·rak ong'ani gimin, mikka wajani gimin do·mesal bimaba nuksik gitchak kimil ring·rang daken nitoachim. Ja dokna kingking uamang kusi ong'griken dongangaha.

Wachikari sokbahaon mikka wabaaha, a'arang, uamangni roram burungrang sosie chijimtokaha. A·ba gamoba, songre songbatoba, anti a'king re'oba, wachi chakna nangaiachim. Uni gimin do·mesal bimani grangrang, ki·merang kimilrang sosie chopjuju dakaiaha Kimilrang, grangrang bo·si bo·dak dakaiani gimin nidik nisi nikaiaha. Segipa do·pilgimni gisiko suk ong·jaha. Ua gisiktango inaha, skangode ia angni jikgipa do·mesal bimara mikkang nitobeachim, bimang daknangbeachim ; da'oara chopjuju, nidik nisi nikaijok. Che ! angade donggija kimgija gale katsrangnok.

Dikdiksani ja·mano do·pilgrim jikgipako gale katangbebeaha. Do·mesal bima grape mikoe, ja·rik sniloba, miknagengchi niari penagengchi doksoaiachim. Indake dakani gimin jikgipa ba·ra itchilari, re·jak pakkol separe kratcha'e, jaksi chike re·pilbaaiaha ina.

Wachi ra·gate do·aran bilbaaha. Mikka wajaha ; a'arang. burungrang chi·ranangaha. Jechi ronaba an·-

sengbaaha. Do'mesal bimani kimilrang grangrang ran'en miksik gitchake kimil chijengbite nitobataiaha. Unon do'pilgim jiktangko nike mikchataibeaha. Uni gimin ua jiktang do'mesal bimako an'tangona re'ba-pilchina mol'molbeaha; indiba ua re'angpiljaha. Uni gimin do'pilgimni gisiko duk man'e skimaha, Him angai ! maina galman pimanjok ! Indakesa da'ona kingking do'pilgimrang him; him ine ma'ama gita sintia gita mikoa ine agana.

Chanchibewalgija kam ka'aniara sintiano bon'ea

GAP

A'chik ma'gitcham pagitchamrang gapko Komre Komse mingachim. Ua bolko wa'ako sol'na repna changbegipa ong'achim ine agana.

Uni gimin skangni chasongo Susimema Sangkil-domani siani bon'ani salo, mangko ganchi rike so'na gita gapkon ganchini krongko sol'china repchina ge'ettokaha. Indake gapba an'tangni bimangtang jagringtangko nirok nisolet ganchini krongrangko grong gonggni gni dake sol'aha.

Ua sal intaltalsa ia salona kingking A'chikrang Susimemani Sangkildomani sianiko gisik ra'ani gitasa, mande sio Kima ine minggipako grong gonggni dake bolko sol'enba noktangtangni mikkango dontokenga.

Namgni dongjaoba, dakbewalko ja'rikkua.

PERU

Skangode peruara salgini achaksa ong'ani gimin salgiosa dongachim. Perukoa salgio donggipa mitesa jile, cha'a raja cha'atachim, donga raja dongatachim.

Peru indake kusi ong'beengako nike do'ka uko miknengteaha. Do'ka makai peruko a'gilsakona rim-onbana mamgen indake cholrangko am'beaha. Salsao do'ka peru sepangona re'ange aganaha. Na'a miteni alduako re'ange cha'a raja cha'enga, donga raja dong-enga beben. Indiba na'a jakgitel ong'e rona re'na man'ja; jakgitel ong'e jeko ska cha'na man'ja. Cha'bo ine on'akosan cha'na nangaia. Angko niboching, anga jechi re'na rona ska jakgitel man'aia. A'o rona inoba, sakchi biina inoba mamung champengani gri. Indake ong'ani giminsan anga da'oba nangona sokbae, nangna ka'sachake iarangko agane on'enga. Cha'a raja cha'oba, donga raja dongoba, gipinni nokkol ongode, mamung rasong gri ong'aia. A'gilsak aro salgisakni pilak ma-malrangan jakgitelko am'a.

Peru do'kani agana kattako knae gisiko duk ong'beaha. Ua da'o an'tangni ong'enga gita dong'angkuna kratcha'nikbeaha, da'o nang baksa re'ode a'gilsako mai namgniko man'gen? ine peru sing'aha.

Do'ka aganchakaha, ching a'gilsakni an'sengakode maiko agankugen. Cha'ani giminba, dongani giminba, da'o nangni dongenga cha'engana batede changchikung nambata ine aganchakaha.

Uni gimin peru do'ka baksa a'gilsakona joljol re'bapaaha. A'gilsakona sokoa do'ka aganaha, na'a da'o jakgitel ong'e dongbeaha la mangmangko agane an'tangde bilangaha. Peru iachi uachi re'e cha'aniko am'beaha. Indiba neng'beesa okko gapatna mangmangan man'aiaha. Saloara mandena kena, Waloara sin'ako chaka dakesa dongna nangahani gimin peru dongtonikjabeaha. Uni gimin peru songtang salgichi re'pilna sike salgichiko nigitoë pring attam indake graprongaha Mai ong'jok angnade ! Rimepilbo wai, ang mite.

Tol·pinikachi amako man·ode dukko man·bea.

DO·BIMAMUNG DO·BIPA

Skang chasongni salrangode, a'gilsakni pilak ma'malranga, a'o donggipa sako bilgipa pilakan ku'sik agangrikna changachim. Salsao do·bima an'tangni tarigimin biapo an'tangni chanchisogimin gita bimangtangna bate changchikung nitobate demechikko ba'gen ine chanchiengachim. Ba'ani sal sokoa, ua biaptango bamaha Adita ru'utani ja'mano ua bitchiko rongsa chi'aha. Do·bima an'tangni chanchisogimin gita ong'ama ong'ja ine niora, sko ki'sang uigija bo·rotrot dakakosa nikaha.

Uni gimin do·bima jajrengbee, sko gri ki'sang gri maiba ong'kata ! maiba ong'kata ! ine chrikwatwataha. Do·bimani kena gnang chrikako knae do·bipa re'ange niaha. Do·bipa aganaha, ja'mano ong'gen, ja'mano

ong'gen. Unon ua jikgipani kenengako nike uchina sinhepcheproroange uko ka'dimeataha. Untalsa da'ona kingking do'bimarang bitchi chi'mano gokatekronga. Gokatekako knaahaon do'bipa chaange Go-go-go-ok ine do'bimachina sinhepchepenga

Pilak dakgimin kamrangni biteko ja'manosa man'a.

PERU AM·PAK KIKA

Sin'karini walsao peru sin'ani gimin duk man'be-engachim. Ua sin'ako chakna man'jae, salgichiko nigitoe, aiao sin'a! ine grapaha Peru ua walo sin'a amchakjae chanchiaha, da'mo seng.kuchina knalde angaba bol bigilko kike am.pak doke chinchongmotgen. ia mangsonganio ua walko re'ataha.

Pring seng'ahaon sal rakbaahaon, sal ding'ani gimin sin'jaha. Indake peru an'tangni am'pak dokna mangsonganikon gualpilaha. Ua kusi ong'e roarisa salko re'ataiaha. Wal ong'taiahaon sin'taiahani gimin gisik ra'taienba, knasalode am'pak dokchongmotgen ine mangsongtaiaha. Sal naenba ding'ako man'taiode gualtaiiachim. Indakesa perurang sin'kario sina chakna amjae mikoronga ina. Mitam mitam manderang maiba nangbea kamko dakgen ine agantaitaia indiba dakja. Indake dakgipa mandekon, Peru am'pak kika ine inronga

dakna nanga kamko dakchengbo

NOKMANA BISI TIKJA

Pilak chipurangna bate chipu nokmaan dal'batgipa aro nitogipa ong'a. Uni gimin chipuni jat gimik uko nokma songtokaha. Untaltal uko uamang mande ra'tokaha. Salsao patigipa ra'rongipa bisi bijongko suale antie on'na ine pilak a'gimikni chipurangni jatrangko an'tangona okamattokaha. Uni gimin pilak chipurangan an'tangtang bakko ra'na ine re'angtokaha. Uamang chipu nokmakoba an'tangtangming damsan re'pachina rimangahachim, indiba uamang baksa re'angpagija aganataiaha, Na'simang chongipa, remgiparang re'ang-sobo, angade nokma ong ani gimin suale donsoara donsoaigen. Angade ja'mansa ka'sin ka'sin re'angaigen. Pilak chipurangni sokangman'tokoa, patigipa ra'rongipa amra ane boltong done bisi bijongko den'kning den'ripike chipu mangprakna jena jekai kraa indake suale antie on'tokaha. Uamang paltangtangko ra'e kusi ong'e noktangtangchi re'angpiltokaha. Chipu nokmanade sualmitingo mikkang nikjani gimin sualchangaha.

Chipu nokmade pilak chipurangni re'angtokmana-haosa an'tangni palko ra'pana ine ringreng ringreng dake, patigipa ra'rongipaona re'angaha. Biapona sok-angoa patigipa ra'rongipao an'tangni palko bi'aha.

Patigipa ra'rongipa aganaha, na'ara da'osa sokbaane? Baosa, nang'nade sualchangahake! Na'ara jinma re'ba-mitingo bachi jamanga! Chipu nokma aganchakaha, na'a maikai nokmajongjongna sualchanga? Sualchangnan nangjachim. Patigipa ra'rongipa ka'onange aganaha,

na'a basakoba jada, basakoba seng'a ong'gen; indiba na'a bisikode man'pajawa. Indakesa da'ona kingking chipu nokmao bisi dongjaha, unbaksaba gisep gisep jada dakaiani gimin manderang uko chipu jada ineba mingronga. Basakoba basakoba manderang an'tang-tangko dal'gipa rakgipa dake mesokenba, maiba man'gniko man'rongja. Indake dakakon, nokmana bisi tikja ine aganronga.

Dakna nangako dakchengbo, ong'jaode dukko man'gen.

SEPAL ARO GIL MAT

Skan salrangode sepalara boltongsa ong'achim, aro gil'mat bijakara ramram bolni bijaksari ongaia-achim. Indiba patigipa ra'rongipa chipurangna bisi bijong sualna ine gil'mat bijakko amra anaha aro sepalkoara boltong dake bisi bijongko den kningchakaha Indakesa sepalba bisi man'paaha aro gil'matoba bisi ma'gapaha. Untalsa da'ona kingking sepal nangode ba gil'mat bijak nangode sabea.

Namgijana jakkalako man'ode, namgijako man'pagen.

CHA·PRETGIPA ME·CHIK

Badiaba songo Chongge aro Kangre jiksese gnangchim. Jikse donggrikani bilsa sani ja'mano Chongge an'tang jikgipa Kangreko nio sarichina misi akjolchina gita Watataha. Maina misi minkari ong'achim. Songona sokangahaon Kangreni niotang uko mande

ra'e, una mi bijak song'e on'soaha. Kangre mi cha-man ringmano an'tangni gipin gipin nio sarirangni nokrangchi grongna re'oroangaha. Kangre noksaona re'ange singaha, Mai bijak song'a sari? Misi rimitak, ang'ke ja'ritak song'a. Cha'panakama? ine saritang aganchakaha. Cha'gen ine a'songe Kangre cha'aha.

Unoni re'ange nokgipinoba, Mai bijak song'a sari ine do'gacholko niue sing'etaiaha. Misi sasang, oko rangrang ine saritang aganaha. Cha'pagenma sari? ine on'oa Kangre unoba adita cha'aha. Unoniba ua saritang sakgipinni nokona re'ange, Mai bijak song'a sari? ine sing'etaiaha. Misi jong su, oko susu ine saritang aganaha. Cha'e nipabo ine on'oa Kangre asongchong'kome adita cha'aha. Cha'manoa saritang saksani nokchina re'angaha. Nokona sokangaon, Mai bijak song'enga saride? ine Kangre sing'eaha. Misi barsat, oko sasat ine saritang aganaha. Mitimama sari? ine chadenggol'take cha'taiaha. Unoni bon-kamgipa saritang chongipani nokchina re'angtaiaha. Uamangba ma'drangan mi cha'tokengachim. Nokona sokangoa, Mai bijak cha'a sari? ine Kangre singeaha. Misi nengwa, oko wawa ine saritang aganaha. Cha'e nipagenma? ine on'oa Kangre tuketchie cha'aha.

Ua segipani bakdrang gnang kakketo attam sanon cha'angoa, okde chaktogija dakenba roo rotogija asongo asongtongija dongo dongtogija, tuo tutogija, dakana, nio sari gimikna kratcha'e walon songona katbaaha, Indiba songona sokna skangan rong'patalo neng'takmitingon ok brete bibik ru'rue siaha.

Agrede pilakan namja.

MATCHOKMUNG SE·EL

Badiaba changsao matchokmung se·el besa ka-grikachim. Uamang ka'sagrike nangrime dongachim. Salsao matchok chirore biteko cha·e ripengtang se·elni nok gita re·pakbaaha Matchok chirore biteko cha·e deke ripengtangni noko chrokna a bachengaha. Ripengtang se·el an·tang dedrangko ga·pretna kenchake ripengtangna aganaha. Angde, wai, angsa wai! Ripengtang matchok knachakgija chrokangaha. Chrokmitingo ua, de-ojasa·oja, ambare peka chirore rim'a; mikronko kolongbak, ki·sangkolko til·ongbak ine agane ga·dengdenge ga·chokchoke chrokanguaha. Indake chrokmitingon matchok se·elni bi·sa mangsako ga·pretmane siataha.

Beng·ako manigija bi·satangko siatahani gimin se·el ka·onange matchokko bildape, ki·sangkolko til·ongbak otaha, mikron ronggniko kolongbak kolongbak otaha. Ua sal intalan uamang bobil ong·baaha. Indakesa da·ona kingking se·el matchokko nikode mikronko ki·sangkolko otchengesa chike charonga ina.

Pekgiparang duko ga·akronga.

DO·PO

Skango, changsao, do·po antang degipa mangdokko rimbite, mangprakko kokprak kilko olate, dimbilbri pal·wang a·dingo cha·gipa antiona, re·dilangaha. Kilko pale man·gipa paisachi uamangnan chola, ba·ra, chira, akke, na·kam, kari, ugita pilak nanga bosturangko bree on·tokgen ine do·po dedrangna aganaha. Dedrang

amapet amjapet graptaitaie mikotaitaie paltangtangko olangenba, antiona sokangaha. Antiona sokangani ru-utkujaon, uamangni donggipa a-tipona adil beraro singga matma grongko pongdok palbaengachim. Uko niksoe do-pode namen man-na sikbeaha. Hai dedrang, ua adilko singgako sakprak pongprak bree ra-nama?

Dedrang aganaha, damko sing'e nibo. Adilni singgani damko sing'oa, pongprak kil kokprak ine palgipa aganaha. Uni gimin uamang kil kokdokko on'ate adil beraru singga matma grong pong dokko ra-aha.

Do-pani indake srea breako nike gipin do-orang aganaha, aiao! nang'ni daka kamde namjajok. Ua adilni singgani damara kila topachi, e-ching kachachi srcoba breoba manaiachim. Indita kilko magna indin gimaat-aajok ine saigrime jara goka ine solgrimaha. A-tip sachi rocpaoba apsanke agane solakosa, a-tip sachi re-angoba inakosa man'aiachim. Uni gimin mikgil kratcha'e bimang rasong one dedrangko, songchi nokchina katdilbaaha. Salo salode songsul nokripeng-rangna kratcha'e nokon napchipchipe, dongdilaha. Attam walangosa nokgil srekena ong'kate, antangtangni kil kokdokchi brebagipa adil beraru singga matma grongko lu-lu-lu-lu, ru-ru-ru-ru, kokdok mangdok pongdok ine sikatskaaha. Untalsa do-poara da-ona kingking gipin do-orangna kratcha-nike salo salo dongnue, gipin-rangni tusiskamitingo walosa ong'katskae lu-lu-lu-lu, ru-ru-ru-ru, kokdok mangdok pongdok ine agana.

*Mikboke dakachi basakobade dal-bea
mangsonganiko gimaata.*

DO·DE

Badiaba songo man'e cha:gipa mande' saksu dongachim. Ua nokna bagipa, mikkang bimang nito-begipa demechik saksu kamkam g'angchim. Pagipa an'tangni demechikna gamchatbegipa, dam rakbegipa, pul jal de'angaggipa miteni ba'rako kingsa bree on'aha. Adita bilsu re'angani ja'mano, pagipa nitobegipa pante saksako chawari rimbac, do'si do'doke on'aha. Uamang bang'a salrangna apsan kusi ong'e dongrimaha. Salsao jikgipa aganaha, anga da'alde na'tok amna re'angnak-enga Na'a nokon dongsoaibo Apani angna bree on'gipa ba'rako rame donangenga. Mikka Waoba balwa rakoba, stil rongmisi onoba na'ara ua ba'rako itnabene. Anga an'tangan sokbao itegen, na'a itsoode, nangnaba ang-naba dal'bea duk onngen; maina ua ba'rara miteni ba rasa ong'a ! Pilak kattarangko agana matchotmanoa, chekke pal'kang ra'e, koksi te'jang kae re'angaha.

Chibimaona sokange adita natok am'angon mikka balwa rakbac, stil rongmisi on'bae wababebeaha. Uko nike jikgipa ba'ratangko itna gita katbaengachim. Segipaba ba'ra sosina kenchake jikgipa itsona beng-angahaoba, bebe ra'bregija ka'sin ka'sin kenchaka g'ang ba'ra ramramona sepangroroe re'angha. Jikgipa uko adita chel aonin nikate, itnabe, ra'sonabe, namjawa namjawa ! ine aganroroe krenge katbaaha. Mikka balwaba rang'san sokbaaha. Una segipa rang'san ba'rako dangtape itna dakon, jikgipaba sokbac ba'rako dang-tapeaha. Dangtapea bakasa aiao ! gose an'chingde gimajok ! ine jikgipa chrikon rang'san do'de bima aro

hipa pil'aha. Segipa skang ba' rako dangtapchengahani
gimin segipao pul bang'bataha. Jikgipa ja'mansa
dangtapna man'caiahani gimin uo pul bang'pajaha.
Indakesa da'ona kingking do'derang mikka wanasiode,
kenani ku'rangchi mikoenga ina.

Beng'ako manian ba kata ra'an pilakna bate nambata.

MIKKOL BAK I

Mikkolmung Nose Dimse Abisa

Badiaba song damsao Nosemung Dimse abisa
dongachim. Uamang mikkang bimang daknanggiparang
ong'achim. Uamango nogipa jonggiparangba dongachini
Salsao uamang abisa na'tok an'cheng gitna kasi
de'bikjona ine koksi te'ritak kae, chekke pal'ittak ra'e
chibimachi re'ange chi-kosakchina gitdobaengachim.
Uamangni na'tok gitdobaako mikkol ba makkre nikenba
uamangna mikchabeaha. Uni gimin uamang abisa
maikae an'tangna mikchaskagen indake ua cholrangko
am'beaha. Chibimani kosakchia badiaba songni pante-
rang nokpantena jamsirengna wa'a den'tokengachim.
Ua panterang sawa sawa wa'sing sinna changbata
ine sinsusac rotokengachim. Ja'manoa uamang sina-
tangtangko chio balboate songchina re'bapiltokaha.

Mikkol manderangni galanggipa wasingrangni bal-
bobaengako nike, ian angni chol, haida, Nose aro
Dimse ia wa'singrangko mikchae ra'naba donga ine
gisiktango chanchie dongengachim. Bean bebe, Nose

Dimse abisani na'tok am'enggipa biapona wa'singrang balpakangahaoa, uamang wa'singrangko nike mikcha-bebeaha. Uamang saksu, sakgipinna inaha, aia abi' toasingde nambea, aia nono, wa'sing sina silbea. Hai abi, nonona ra'na; hai nono, jojongna kolna. Chi ko'e rochina, mi songe kal'china ine agane kolamsoaha, Mikkol iarangko knatime dongengachim aro abisan koldingdange ra'engako nikahaon, angko kimna inode toasingko ra'bo, angko dongna inode wa'singtokko kolbo ine mikkol inataha.

Aganatani ku-rang gambaa dingding niatoa mikkol ba makkre bondakosa nikataha. Tuai ! tuai ! nang'ni toasingkoba ra'ja, mikkolkoba dongja, hai abi galatbo, hai nono donpilbo ine agane studapdape chichin galatpiltokaha. Mikkolde kratcha'e mikgilgepgep dake dongaiaha. Indake uamang abisa chikoggni chikong gitamona na'tik am'roroangaha. Mikkolba mikgil sigija ja'man ja'man ja'rikangaha. Adita gitdoanguon, uamang bol pangsao salchame sa'ako nikate Dimse abitangna aganaha. Aia abi salchame sa'a wai ! namnambeenggenchim, na'a, Oe, uara, nono ! namnambebeachim. Jojongna jille rona, nonona kal'e rona nambeengchim. Saoba uko ra'e on'na man'gipakode bangal ja'golangsikoba, rori gingchokdengdengkoba chame ingenchim, angse changenchim ine Nose aganaha. Dimseba apsan aganpaha. Indinako mikkol knae, ki'sang doktoptope namen kusi ong'bee aganaha. Anga ra'e on'gen, anga ra'e on'ode na'simang apsan nonosan angko donggen kimgenma ? Anak ong'oba chame ingnok, mikkol ong'oba angse changnokchim ine abisan aganaha.

Uamang abisa ku-rachaksrapgijan, mikkol rang-san ki'sang doktoptope salchame sa'gipa bolgisichi mal-doangaha. Salchame sa'ram biapona sokangoa ua rang-san a'kolchi an tangni jakko sikpretataha. Salchame bi'sa donggipaona sokangaha, indiba bi-sarangko rim'e otbana dakoa, jakko a'palona, salokbanan man jaha. Mikkolni jakko changketchangaha. Basikmang chame mikkol? ine Nose sing'ataha. Na'simangnamung ang-namung na'simangni jongdrang nodrangnamung chu-onga inc mikkol aganchakaha. Basikmang chong'mot donga, chane niboching ine Dimse aganataha.

Mangsa manggni, manggitam, mangblok ine mikkol agane. Ha gualahake! ine pil'taitaie indaken chana dakaha. Chang chingaba nipana, mangsa bikote niboching ine abisan mikkolna aganataha. Mikkol an'tangni jakko salokna am'o am'o man'jae, da'mo inari, chantaitaia dakengachim. Nose Dimse abisa gitokreng neng-pile mikron cham'pile, nigitoe, mesokatchina ong'jaoba ra'onbachina agantaitaioaba, mikkol chana daksimsime dongaiani gimin uamang inaha, Che! chame mikkolde jak changketakon! Che! chame mikkolde jak changketakon!

Mikkol namadake jakasini jakkosa gongbengbeng dakate, iara, changketjake ine mesokata dakaha. Iachide mikkolni jakde salokna joton ka'anin ripim-changpilaha. Mikkol jakko salokpilna jegita tikeloba man'jaha. Che chame mikkolde jak changketmanchaaha, indaken salchame bi'sakoba ra'onbana man'jaengjok ine Nose aganattaiaha.

Mikkol jakasini jakkosa, Iara. changketjake ine mesokattaiaha. Indake sal do-bret ki'sang dakaona dikmeattain chanapona, mikkolni salchame ra'onbaako sengoba amchakjae, Hai nono reginok, imo abi doginok. Chame mikkolde, angse amakde jak changketchangen re-bajajok, ong-onjajok ine abisan agangrike, chingade nokchi re'gnok, na'a dongrikbo chame ine agane re-baaha. Unon mikkolde kratcha'e miksichepchep nirikaiaha. Ua da'osa an'tangni chanchininggija daka kamko gisik ra'e grapaha.

Pilakko dakna skangba mikkang janggal nichengna nanga.

MIKKOL BAK II

Mikkolmung Matchadu Jiksesa

Mikkolni jak changkete dongani sal gittamgipao, matchadu buchuma budepa jiksesa a'a opate samsepe nipana ine mikkolni jak changkete dongenggipa jolona re-baaha. Ia a'an misi silgen, ta'a e-ching namgen ine jiksesean uko o'na melaaha. Intangwalo an-ching mai jumangko nikgen uko nina gita on'tisa o'pate nibo ine jikgipa buchuma aganaha.

Uni gimin o'na a-bachengani pe'chengani bewal gita O mitea, Abeta ranggea, ia a'ao songdong a-chagipara, a'paksachina, chinalsachina, korako koko ole, kanako jako sale katangbone re'angbone; a'a cha'naka, song dongnaka ine miteko a'rikchengaha. Aman apan a'song chingakode, narang kampilakode

te·brong te·gatchukode wate katjawa ine mikkolsa a·kong bo·ol bo·olchi chrike aganchakataha. Uko knae matchadu jiksesa kene nigrike agangrikaha, Aiao! sawasai? miteanma, mandeanma? Hai buchuma am'e nina ine gam·baa dingding sandie niangaha. Adita chel·kale a·kongchi ong·onange sandiangon, chisamale chagipa bolgisioniko mikkolko nikeaha. Ha! na'a amaksa mikkolsa chingko kenatgipa, jajrengatgipa attamo gedamung puramung pura pue song'e cha'na gita nang'ko rime ra'anggen ine matchadu bolchi gakatangaha.

Oh atchu ambi, anga na·simang ine ujaesa mangkale aganatmanaha. Kema ka·pabo. Angko chike song'e cha·panabe. Batesa na·simang angni jak changketaoniko angko pue jokatode, anga na·simangni de gita su gita dake na·simangna nokrik nokdake, game sue ong'inokchim ine mikkol mol·mole aganaha.

Atcha, na'a chingko game sue aldugen mittanggen ine ku·rachakode, chinga nang'ko jokatgen ine matchadu agane, ruachi bolko pue mikkolko jokataha. Unikoa a'aona ba·tombae an·tangtangni mesal ra·bit·baako cha·china on'aha. Mikkol kusi ong·bee cha'aha, maina salgittamna cha'na man·jae okkribehachim, Mesal ra·angako cha·man ringmanoa, uamang nokona re·batokaha. Mikkolni jak ripimchangakoba matchadu jiksesan sane bane namkalataha.

Jak ripima namkalahaoa, salsao, mikkol matchadu budepa buchumana aganaha, Atchu ambi, na·simangsa angni ma'a paa ong'a Na·simang angko jokatjahaode

angade sigimin sogiminsahachim. Ia pilako nikon na-simang angko naljokahani gimin anga na-simangna gro nanggipa on'ga. Dao'de na-simanga noko dongari cha'a raja cha'aiboho, ringa raja ringaiboho; pilak kamrangkon angan dakskaignok. Anga a'ba o'gen, gamgen sugen, nokrik nokdakgen; na-simangde sal sal nokdecholo neue, rangkareo ja'sue roaibo cha'aibo Angan aldu mittange siatgen ine mikkol aganaha. Angaba knasalde darang marangni daka gita a'ba o'e nipana re'anggen. Mesal tarie on'atbo ine mikkol aganaha.

Pring seng'ahaoa matchadu buchuma mesal katome mikkolna on'ataha. Mikkolba kotip kadoreke, atte pakkol sepe, a'a on'a re'angaba. A-briona sok-angon a'akode o'gija bolsil gongdango, salakim ka'sinao asonge roarisa, A-seoni warlingba gongba gongba, ia angni jakba ritimba ritimba ine salgimik roaiaha; maina mikkolni jakara sosote chotomsrangahachim. Ok okkriahaoa, an'tangni mesal ra'angako cha'e roaiachim. Attam salniangon bol pangsaoni pangsaona bilrurae an'tangko neng'ate ding'olatenba nokchina atte pakkol sepe re'angpilaha.

Nokona soke meatam cha'man ringmanoa, angni a'a o'ade pilak darangni o'ana den'ana bate nambata. Mi misi namgen, kil gogen, ta'a, e'ching, rasin, ja'lik, me-rakku silgen ine ambitang atchutangna aganea dakmikaha. Indaken sal sal mesal ra'e, atte wil'e a'bach i re'anga dakmike, bolkambeo tusie, okkrio mesalko cha'e sal napangna siosa nokona re'ba dakmikaiachim.

Indaken ja samang salko re'atangaha. Matchadu jik-sesade, da'nang angsu, da'nang angde, bil cham'e jak cham'e ka-bebe o'beengjok ine kusi ong'beaha.

A'a so-kari ong'ahaon, da'alde songgimikan a'a so'gen ine aganon, Atchu ambi da'atamde pilak bitchri bigronrangko tarie dontokboaha, knalde songa noka jang'ki do'ga a'a so-tokgnokna ine mikkolba agana dakpaaha.

Bean bebe pringoa, mikkolba a'a so'na ine dakmike, a'bri niwataona doange darangmarangni a'a so'ako a'kimbrio bolo gakate nigame roaiaha. Attamahaoa an'tangko dingolate nokona re'baaha. A'a so'ade namen kamsranga kilnan nangbrejawa. Kilna nangoba salsa mangsan kilna nangaigen ine mikkol aganeaha. Knal pringode mi, misi, ta'a, e'ching,me rakku, bil'ikrangko ge'gen. Pilakkon da'walo rite dontokbo. Maina chingni songode pilak bitchilrangkon ritchengesa ge'a ine mikkol matchadu jiksesana aganaha.

Ong'bebeengnaba donga ine matchadu jiksesa aganaha. Uamang mikkolni kattako bebe ra'e pilak bitchilrangkon walo walgimik rite dontokaha.

Pringo pringwalnin mikkol chakate, cha'e ringe, pilak ritgimin bitchilrangko koko siktoke mesal katome a'bachu re'angaha. Matchadu jiksesaba a'bachu re'pae ge'anirangko ge'bilbalpana aganpaaha: indiba mikkolan re'pana on'jaha. Mikkolde rong'patal namako salak-kimako am'esa an'tangni olanga ritgimin bitchilrangko pakdame, salgimik cha'na siko cha'enga, tusina siko tusienga dake jajrenggija salko re'ataha. Attam sal-

niangahaosa, an'tang be'en gimiko dimakko nonge re-baaha. Indaken sal sal a'bachu re'a dakmike matchadu jiksesako togie roaengachim. Salsao matchadu jiksesaba mikkolni a'a o'ako nipana ine an'tangtangko rimpachina mol-molaha. Mikkol ma-mantiko pa'sike uamangk rimangna siggijaniko mesokaha. Indiba uamang anigija re'pana am-telahani gimin mikkol aganaha, atchu umbi, indide re'bo; da'alde salchuaha, neng'dik bakdik dakaignok. Indine agane donange an'tangde a'bachu re'anga daktaiaha. Burungona sokangoa gipin a'ba so'arangni agal kambatgipa biapko nie, alamala bol bi'sa, wa'a bi'sa rohigiparangko den'kie, misini pal saoreko e'ching a'gako, ta'ani pal talak burungko pikbae ge'songe donetokaha. Pilakkon matchottokahaoa chelkalaona re'ange nigame nie namaha ine nikoa songchi nokchi kusi ong'e re'angaha.

Nokona sokangoa mikkol aganaha, knalde angni rite ge'gimin bitchilrangni dal'ningako niaibojok. Gipin gipin bitchil ritgija ge'gipa a'barangode da'osa naba-enga, indiba angni a'baode grimgrim nikpilaiaha. Pring ong'ahaoa, mikkol kotip kadoreke, atte pakkol sepe, matchadu buchuma budepana skangskang gongbeng gongbeng re'angaha. Uni tarigimin biapona sepangoa, a kong a'dap dakaoniko mesokate inaha, aoa simdikdik nikatgipan angni a'ba. Matchadu budepa buchuma a baona sepangaha ine nikoa kusi ong'baaha. Uni tarigimin a'bani sepango rong-patal damsia dongachim. Mikkol uamangko uno niwatchina uona rimangaha.

Ambi atchu da'ode niwate niboda. Gipin gipin a'barangode misi, ta'a, e'chingrangara da'osa chaba-

enga; angni a-baoniko niboda, grimgrim nikatpilaiaha Matchadu jiksese niate mikkolni aoan a-ba ine mesokataoniko grimgrim nikatbebeaha. Aiao, bebe danang, angsu mikkolni aganan bebe miba, misiba. ta'a, e'ching, ja'lik pilakan rite ge'osa dal'ningbat bebea da'nang! ine aganaha.

Da'ode na'simang re'ange nina skode re'ange nieaiboaha, anga iano ontisa maikoba dakrikkuna. Indinana matchadu buchuma budepa kusi ong'e a-ba manchaona re'ange niaha. Sepangmanchaona re'ange name nioara mikkol uamangko togibeaha ine nikaha. Pilak grimgrim ge'giminrangara burungni sam bolrangko pike ge'songgiminrangsan ong'aiachim, ine nikaha. Uamang jiksese namen ka'onangbeaha. Indiba mikkolde bolkambeo gakate ambi atchukode tol'e rona man'aia da'nang! Angara na'simangni song'e rite on'atgimin mi, misi, ta'a ta'jongrangkoara ia rong'patalosa salgimik gimik cha'e roaiachim danang! ine ka'dingmisiesa roataha. Matchadu budepa buchuma ka'ara amja bilara sokja dake aganaha, da'mo nang'koba basakoba man'gen. Indine agane, duk ong'bee noktangchi re'bapilaha.

Bebera'ninggiparang togigiparangni duk on'ako mamronga.

MIKKOL BAK III

Matchadu Jiksesa Mikkolko A-jak soka

Matchadu budepa buchuma maikai mikkolko rim'na man'gen sal sal chanchibeaha. Chanchien chanchien bon'kamao mingsa cholko dake nina mangsongaha. Matchadu budepa buchuma songni nokni manderangko okame, mikkolko rim'na uamangko dakchakpachina mol'molaha. Uamangba dakchakpana ku'rachakaha.

Salsao matchadu jiksesean sia dakaha, aro uamangko nok jatchio pujua dake done songni manderang uamangna grapa kalima dakaha. Atchutang ambitangmangni siaona re'bapachina gita mikkolko rimechina gita do'mesalko watataha.

Do'mesal mikkolni dongram biap'na re'ange mikkolna aganaha, Nang'ni gale katbaani giminan nang'ni ambitang atchutangde cha'gija ringgija nang'nan sal sal kalimari grapari dongarin, saa man'e da'siwalo siangsrangaha. Uni gimin mikkang jajong mangmangkode nirikpana namniknaba donga ine su'gipa mikkolko rime nibo ine songni manderangni aganatani giminsa angade re'baenga. Hai, re'nakama? ine do'mesal mongaha.

He, tol'asa; angko chike cha'na sike chol dakengasa ine mikkol aganaha.

Nang'ko tol'e rojaenga, songde nokde kalime grapan maiba dakpilaiengjok; na'ade tol'a inesa pot-skaengjok. Re'enba bolkambeo mangba gakate niate nibo ine do'mesal agantaiaha.

Hat, ! tol'asa. Nang'ni mikkang bimangko niarin mamung dukni chinkon nikja ine agane mikkol katangaha. Do mesalba mong'o man'jac katbapilaiaha.

Iani ja'mano do'grikko mikkolona watataiaha. Do'grikba mikkolko gronge una ma'manti kattarangko agane uko rimaha. Indiba mikkol beber'jaengachim. Angni mikkang bimangkoba nipabo mai, da'siwalo grape walsengani giminan angade miksik gitchakpiljok, mikron ripimpilengjok ine do'grik an'tangko mesokaha.

Unosa mikkol beber'a'e, Atchu wai, ambi wai, angna kalimeni, bika a'dram be'en sibebeaijok danang ! ine mikkol grapaha. Hai, nokchi jamchi re'esa grapbo ninibo ine do'grik rimangaha.

Songona sepangangon mikkol kena mitam, kenja mitam dakesa re'angengachim. Adita chel'aoni niwatate nioa matchaduni noko mande bang'bee tom'engako nikate do'grikni katta bebe ong'chongmota ine bebe ra'srangaha. Ua da'o ka'dongbate nokona re'baaha. Saraona sokoa chongpetpet asonge, Atchu wai ambi wai ine mikkol grapaha.

Atchutang ambitangna ka'sabebeoa nokona jamona napesa grapebo mikoebo ine jinmarang manengagnang aganaha. Unon nokkraona re'ange grapeaha.

Mikkolni nokona napahaoa, dama dachi, rang krajn dokgiparangba, Do'gacholko pengpeng, nokdecholko chip chip, kolgipuko peng peng ine dokattokon, do'gachol, nokdechol, kolgipu pilakkon peng'tokaha chiptokaha.

nokkolan mejalo dakgrikna ku-rachake donange angko da'al togie watatsaahakon. Indake ong'ode iade angkode watjawaha. Da'o anga maiko dakgen !

Mejalo nang'ko knal attamo dakgrikna ine manchie dongipade angade ong'pajachim; angni nokkolsa mejal attamode iano tueachim. Uara da'al attamde saenga ine dongrikaha. Angade ia a'bani nokgipasa, uni gimin angade na'simangni mejalni kattakode mamungkoba uipaja. Angkode kema ka-pabo. Knal attamo anga ua mandekon watatgen, unon na'a un baksa dakgrikna man'gen ine nokgipa aganaha. Indiba ua bima aganaha, Angade uija. Hai dakgrikna, bakbak chakatbo. Bakbak tarijaode angade chike cha'sranggen.

Danang ! nokgipa sikjaoba, draen borangoni a'aona ong'onbana nangaha. Ua sko mat bitip ki'sang deng-reng ki'tik dakgipa bimani ding'ara waralo anga gita ding'achim. Tangtonganin ding'ako chaksona anjapil-achim. An'ching maikai dakgrikna, skochi totgriknama, ki'sangchi jiltinggriknama ? ine ua bima mandeo sing'aha. Ki'sangchi jiltinggrikna ine ua mande aganchakaha. Sawa jiltingchenggen, sawa chaksochenggen ? ine ua bima mandeo sing'aha. Anga chaksochenggen, na'a jiltingchengbo ine mande aganchakaha.

Atcha, na'a chaksochengbo, anga adita katange ki'sangchi jiltingegen ine ua bima adita katangaha. Ua bimani ki'sangchi katangmitingo mandede man'a dipet songtangchina bitinangaha. Adita chel'angahaoa ua ki'sangchi jiltingna janggalate chabaaha. Mandeba

uko niksoe an'tangni sel'uko sachake dongsoa
ki'sango nange bu'aha.

Aia, na'a gol-dikko donsoa da'nang! Da'ode
donsonabeaha ine agane ki'sangchi adita chel'e kat-
angtaiaha. Aiao da'nang! ua bimani mandechina
sepangbaon wal'sareo anga gita ding'aonin mamung
dingtangjachim. Uandake ua bimani jiltingtaina ki-
sangchi katangmitingon mandeba bate bate songtangchi
bitinbatoroaha. Ua bima chabao chabaode ua mande
sel'uchi su'e su'e watataha. Indake walgimik dakriken
mandeba nokona soka walba seng'na dakaha. Unosa
ua bimaba, knalba dakgriktaigen ine agane re'angaha.

Da'nang! Mandede noktangona sokoa, walgimiko
ong'a pilak kattarangko jikna dena agane on'arin siaiaha.
Uni be'en gimikko nioara wa'al kangimingita tapping-
tokaha, aro ja'mano wa'al kangimin boltong gita
gisimtoksrangaha.

*Bebegijagipa nokkolrang nokgipako gimaatani
cholrangko dakronga.*

DAJIPMUNG DANGGO

Changsao Dajipmung Danggo sadusa
merong, me'chu, na'kam, kari, ra'e, kok ole, antichi
re'angaha. Antiona salgni belasa re'na nangachim.
Uamang chibima damsaona sokoa salniahani gimin
unon, chibimani an'chengo mi song'e cha'aha. 'la biap

burung jatchi ong'achim, sepangjolo song dongjachim. Uni gimin mi cha'man ringmanoa, bano maidake tuani ong'gen uko uamang agangrikaha. Sadutang dal'gipa Dajip aganaha. Angkoti, ianode sin'begen maina chisam ong'a, Uni gimin wa'al so'e tuna gita, hai an'chinga da'on seng'mitingon boltong am'e donna.

Sadutang chongipa Danggo mi okkaahani gimin boltong am'na aratjok. Ua aganaha, la anchengan dinga, ianon konge tue walsakode re'atainaha, angkoti; maina neng'ma dikma boltong am'e, ripee roaienggen. Sadutang dal'gipa aganaha, na'a gongjaoba angade boltong dane so'esa tunaka ine agane boltong ripena burungchi re'angaha. Dajipde walna skangan adita boltongrangko dandakbebeaha.

Walangon sadutang dal'gipa Dajipde an'tang boltong dandakgimin dane so'e tuaha indiba sadutang chongipa Danggode an'chengo konge tuaiaha. Aditana kingking, wa'al jelsrangkujana kingking Dajip sin'ana kom'tote tuna nangaha. Ua sin'bebaana kom'tote tue inaha, Gangga borara.

Sadutangni indake aganengmitingo Danggode an'chengo kite tue ding'ako man'engachim, maina attamachibasaran ong'engani gimin an'cheng ding'ku-engachim. Uni gimin ua, ka'tong bu'ul bu'ul ine inatskaaha. Adita waltingangoa, sadutang dal'gipaba wa'al sika jelbaahaoa, ding'ako man'e tusinapangaha. Indiba sadutang chongipa waltingangahani gimin an'cheng chigadoe sin'ako chakna am'chakpiljae sibok-angskaaha. Sadutang dal'gipa simaksa tuaoni mikrake,

Gangga borara ine inattaiaha. Sadutang chongipa mamungkoba aganchakjaha. Una mai ong'aha ine re'ange nioara, sin'a nape sadutangni sibokakosa nikeaha.

Angkoti, angkoti ine demesabeahaoba ua uijaha. Uni gimin sadutang dal-gipa an-tangni wa'al sikaona uko de-tomange wa'alo angeaha. Ua wa'alo walgimik seng-nasipile angahaosa tangchapilbaaha. Indake wal seng'ahaoa, uamang antichiba re'angsranggija songchi nokchi re'angpilaiaha.

Aratgipa mande dukko grongninga.

AMBARE SEGIN

Changsao Jeng minggipa pante saksa, sal ding-beani salo Nokse minggipani noko ambare segin su'kningako okkae cha'aha. Cha'manoa ua chi ringna sikbeaha. Uni gimin ua Nokse minggipa me-chiko chi ringna bi'aha. Nokse una chi lausa ra'bae on'eaha. Jeng chiko ringaton ua chi chi-bea ine nikaha. Ua aiao inmanpile groksa ringe nitaiaha, indiba ua chi chi-chongmota-chim. Indake ua lau sako bon-toksrangkujana kingking ringangaha.

Jeng gisiktango chanchiaha, aiao! iamangni chia mini minirangde indake chi-jachim! Danang Nokseni chi de'e on'ade maikai chi-bea! Danang. Ua ambare segin cha'e chi ringode chiko chi-nika ine uikujachim. Uni gimin ua Noksean chiko chi-atgipa ong'akon ine

chanchie, uko kimode pangnan ua chi chi ako ring-
rongna man genchim ine untal una gisik nangaha.
Indake ru-utgijan me-chikni mama adarang uamang-
ni mikchagrikako nike uamangko do'si do'doke on'aha.

Sal gipinoa Jeng Nokseko chi ring'na ra'echina
ge'etataha. Jikgipa Nokseba segipana lauo chi rue
ra'eaha. Ua da'apakoba Nokseni chi ra'baa chi-chong-
motgen ine ka donge adita ring'ataha. Indiba ua chi
chi-jahashim. Uni gimin ua gisiktango aganaha. Skang-
ode Nokseni chi rue on'ara chi-beachim, unasa anga
kimpaachim da'ode maina chi-jaha! Iling, ia me-chik
angko man'na mangmangsa togiaha. Anga ia noko
dongjawaha ine chanchienba jikko gale katangaha.

*A'selko sandichenggija mamungkoba rang'san
dakna nangja.*

GAME CHA-GIPA

Saksa a-pal game cha-gipa mandeo matchu harisa,
gure mangsa gnangchim. Ua mande walsao uni turam
skopangona miteni re'bae indine aganeako knaaha.
Na'a pilak a'o rogipa chio donggipa, sako bilgiparangni
ku-sikko uina man'gen. Indiba nang'ni uigiminko na'a
jenaba aganskac on'ode, na'an sigen.

Indake walsao ua biapo tusina tue dongengmitingo,
uni matchurangmung gureni agangrikengako knaaha.
Matchurangoni mangsa gurena inaha, Ripeng na'ade
chingna bate kusi ong-batenga. Chingade pringoba

walingengonin chakate sal tongsaona kingkingan hal gamna nanga. Tusinan suk ong'e man-pajaha, okkac cha'naba man-paja. Indiba na'ade sal sal roari, kusi ong'e cha'enga.

Unon gure aganchakaha. Ripengrang angni agana gita dakbo. Knal pringo nokgipa hal gamna ine na'simangko mona re-baon na'simanga ku'chi bokbak bokbak dake saa daksoho. Unon nokgipa na'simangko hal gamna moangjawa. Na'simang indake pringsamang-mang neng'takpana man'gen.

Unon nokgipa ka'dingsike gisiktango inaha. Na'simangni agangrikani kattarangko angaba uitoka. Knal pringosa uiaigen.

Pring seng'ahaoa nokgipa matchu gohaliona re'ange nioa, matchu manggnikon ku'chi bokbak bokbak dake saa dakengako nikebebeaha. Atcha, na'simangde da'al pringde, saenga, hal gamna man'jawa; indiba gurede sajaenga, uni gimin ukon na'simangni pal gamatskana ine agane, gureko salgimik hal gamatskaaha.

Attamo gohaliona napaahaoa, gure matchurangko inaha. Na'simangko saa dakbo ine skiaiskijai an'tangsa neng'skime gamskana nangaijok. Hat! Knal pringde saa daktainabea.

Uamangni indake agangrikengako knae nokgipako ka'dingsobeaha. Unon jikgipa, indin dongari maina ka'dinga ine segipao sing-beaha. Indiba segipa miteni agana gita sina kene jikgipana uni ka'dingani mang-songaniko aganjaha. Indiba jikgipa graptaitai, Maina

indin dongari ka'dinga? ine sing'chaaha. Uni gimin segipa duk man'pile maiko dakgen ine pring seng'ahaon noksamchi katange ku'bososo dake asonge dongaha.

Uni indake duk man'e maiko dakgnok anga ine chanchimitingo do'bipa mangsa do'bima mangdokko rimbite uni asonge donggipachipakin cha'amdilbaeng-ako nikaha. Unon do'bimarangoni mangsa do'bipao sing'aha. An'chingni nokgipa da'alde maina duk man'a gita dongengasai?

Do'bipa aganchakaha, Anchingni nokgipa an'tangni matchu aro gureni agangrika kattarangko knae ka'dingaha. Uni gimin jikgipa maina ka'dinga ine wal-gimik sing'chaaha. Ua a'selko agane on'ode ua da'on singenchim; uni giminsa maiko dako namgnok ine chanchie duk man'enga. An'chingni nokgipaan goka, jik saksamangmangkon sason ka'na man'jae sinasienga. Angko niboching, angni jikgipa mangdok gnang ukon anga sason ka'na man'enga. Hal gamani loruko nokkingoniko ra'one nom'bokpile sing'taijawaha ine kurachakate dokaiboching! unon uigen ine do'bipa aganchakaha.

Uko nokgipa knae, oe bebe, nang'on jik mangdok gnang, ukon na'a sason ka'na man'a Indiba angode jikgipa saksasan dongaia, ukon angade sason ka'na man'jae an'tangsa sinasienga. Uni gimin anga do'bipani agana gitan dakna nanggen ine agane nokkingoni loruko ra'one jikgipako da'ontaltal sing'taijawaha ine kurachakate dokbeaha. Indake daleesa ua signioni jokaha.

Changgija uisokgijachin mands duko ga'akronga.

MAT AN·CHI PILA

Skangni chasongo, Susimemani Sangkildomani sian bon'an salo a'o malgipa, chio rogipa sako bilgipa pilakan uni siaona re·batokaha. Ia re·bagiparangoni mitam ganchi rikaha, mitam chu cheke kanaha, mitam mi bijak song·aha, mitam mango dongtimaha, mitama wak matchu rataha. Indiba matde mamungkoba dakpagija chu ringari, wak be'en so'e cha'ari roaia-chim. Chu pekahoa chrok mesaari dongaiachim.

Mat mi bijak song·giparangchi, chu chekgiparangchi, ganchi ringgiparangchi, wak matchu doke ratgipa tetgiparangchi, mango dongtingiparangchi re·jojoe gotilek gosiltek dake chrokjoljolaiachim. Ua beng'akoba kangakoba manijachim.

Indake wak matchu greng gitakgiparangchi beng'ako manigija chrokangon mat ki'meni ku·chotko den·sotatmanaha. Indiba matde an'tang ki'me chottomaha inc uijae, pilakchin ki'me songdodoe gotileke chrokengani gimin pilakchin uni an'chi satkikia gita nangtokaha.

*Untalsa da'ona kingking maiba bang·gija man'aniko
on·tiprak suale cha'akon, mat an'chi pila gita
ine aganronga.*

DO·BOKMUNG PERU

Skangni chasongo do·bokni atchu ambi peruni atchu ambioniko karapni salo misi kok dok, mi tora dokko ra·chakaha. Ja·mano do·bokni atchu ambi an·-

tangtangni ra·chakgimin mi misiko chotna man·gija siangaha. Uni gimin da·ona kingking peruni de su·drang do·bokni de su·drangoniko gro rike, perurang do·bokrangko nachilo chikkape burungchina salange chike cha·ronga ine agana. Peru nachilo chikkapesa do·bokko salangaioba, do·bokrang ku·samangba mikorongja. Ua·rang jechina salanga uchinan joljol re·angaia. Ukoara ma·gitcham pagitchamni gro dakani a·sel mikoja ine manderang agana.

*Uni gimin tangmiting nammiting salrango gro dakna
nangja Grojinang dake siangode jikderang, deritchu
su·ritchurangna namja.*

ME·MANG

Skango Gongja minggipa mande saksas an·tang noksulni jikgipani siao mangtupaaha. Attamode pilak manderangan churinge chu peke dongtokengachim. Waltingangon pilakan tusitokaha. Gongja saksasan tusigija dongaiengachim. Gongjade tusipana jotton ka·beahaoba tusipana man·jahachim.

Adita waltingangahaoa, ua kenna a·bachengaha. Kenako chakchikoba amjae, turimska ripengskarango de·mesaoba saksaba mikrakjaha. Se·etoba puchinoba mikraktokjaha. Gongja maiko dakgen uijapilaha. Ua chakate noktangchi katangna chanchiaha, indiba me·-

mang jarikangpanaba donga ine kenaha. Uni gimin ua jinma gitan tusia dake dongaiaha.

Adita dongon sigipa mande an'tangko pujuramon: chakate, sala ra'e an'tangni nok gimikkon itrokangaha. An'tangna mangtuenggipa manderangni kosakmangkoba itrokangaiaha. Uko nike Gongjade namen kenbeaha. Indaken an'tangni samtangtango tugipa manderangkode chikamung ku.akamung dake de'mesaaha. Indiba ua uamangko mikrakatna man'jaha.

Nok gimikko itroka matchotahaon, ua an'tangna mangtugipa manderangni ku'sikrangko chitkreke chitkreke wagam channa abachengaha Uandake sulsul chanbaengachim. Gongja uni chananirangko mikchipec knatimengachim. Me'mang indake chanengachim. Asa, agin, jora, jogin, mina, kawa, oktem, padura, olasi, chokpet ine sakantini wagamrangko chanbaaha. Gongjani sepangona soko, ua an'tangkoba chanangchina ine ku'ange wakengsisi wagamrangko naate dongsoaha. Me'mang Gongjani wagamrangko jaksitangchi ge'sa ge'sa rim'e, Asa, agin, jora, jogin ine chanangmitingon Gongja me'mangni jaksiko chikpretataha. Unosa Hei-i-i ine chrike pujuramtangona re'ange dongepilaha. Me'mang chrikani gimin pilak mangtugiparang tusiaoni mikraktokaha.

Indaka agananirango A'chikrang me'mangna kenbea aro bi'sarangko iarangko agane kenatranga.

Kenatara ka'donganiko gimaata.

ANG-KE

Badiaba songo mande saksu gngangchim. Unbakas uni jik aro uni ka'sabegipa depante saksu, rama gong-rakbagimin gngangchim. Uamang a-bao dongeng-achim. Sal sao pagipa antichi re'angaha. Re-chakatna skang ua depantena, anga lololchi (antichi) re'angnane; anga nang-na ba-ra, mitai ra-banane. Na-ara angko sreko nisobone ine agane re'angaha. Antiona re-na sal gni nangachim. Pagipani re'angani ja'manon, bean bebe ua bi-saba pagipani agananga gita salantian sreko nisoe okamrongachim;

Apa wai, baba wai apa wai,
Chola ba-ra ra-babo, mitaikoba ra-babo.
Chia dal'a inode, ringbanggio chobabo,
Rama dika inode, do'do pil'e bilbabo.

Pringsao ma'gipa aganaha, daalode nang-pa anti sokbaginok, name nisobo. Bi'sa kusi ong-bee skang salrango gita sal tongsaona kingking sreko chadenge, chikoramchipak mikkange nisoaha. Ja'mano neng-a amchakjae, apa sokbakuja, on'tisa tuikuna ine agane tusiangaha. Sal napna skangan pagipa kok ole chiga-tang chidareona sokbaaha. Chingatangona sokbaos, au miksue re-na ine ua kokko one au miksuaaha. Au mitingo rong-patalo ang-kerong dal-beani gengguang gengguang malengako nike, an'tang depante soe cha-china ine grong ake ja'si pe'e ra-aha. Pagipani grong ja'si akmiting pe-mitingon depanteba, ai'a ja'a jak saa. Ai'a ja'a jak sa'a jne chrike janggi galaha. Da-nang ma'gipade grape gipake dongaiaha.

Pagipa nokona sokbaoa jikgipani depanteko gipake grapako nike, mai ong'a? ine sing'caha. Jikgipa depantegipani pilak kamrangko grap grape segipana aganaha. Unon segipa depantena mai ong'aha uko uiaha. Ua grape aganaha, babara ang'ke pil'esa angko chidareo nisoachim, da'nang! Angara uijajok. Himangai, angan babako so'otmanjok! Untalsa A'chikrang bi'sarangni tusimitingo guk, jo'ong aro mamungkoba so'otna on'ja. Maina A'chikrang manderangni jama janggi tusimitingo guk, jo'ong ba ugita ma'manti bimang pil'e roama ine beberaa.

Kenatachi mandeko bebera drata.

DEPANTEKO DINGDINGANI

Ding dedea, dede gring changding, ding dedea !
 Sara samsi ro'dinga, ding dedea !
 Do'ma gita bilangbo angdene,
 Rangsia gita weangbo angdane,
 Angni chata a'wea dedea,
 Angni re'jak dikila apara.
 Matcha helbikbikana ba'a dedeko,
 Do'reng gaksasiana neng'a do'mako.
 Nang'na mil'am sel'une, dedene,
 Nang'na sepi kangsari angdane.
 Bobilna skang chilna ba'jok dedeko,
 Matchana ja'man chakna neng'jok angdeko.
 Sio so'nakgipajok angdea,
 Gano cha'nakgipajok do'mara.
 Gitingni salakimo ja'nengtakbone,
 Ranini durubolo ba'e gisikbone,
 Apara, do'mara, Rangsia.
 Ding dedea.

DEMECHIKKO DINGDINGANI

Amara, ta'mara, gitinga, rania, ding dede ding !
Ang ta'ma ta'giting bitchirina ge'gipa,
Ang mema rongtambing rongjanggina dongipa.
Ta'ma gita jelangbo, dedene,
Giting gita silangbo ranine.
Dede menil achari, ding ta'mara,
Angde giting balmisi ding dedea.
Duru bolna ba'ara ta'mako.
Nokbichongna dinara gitingko.
Song'o rae'dik sronge chanbo amane,
Ito sala ma'gape itbo ta'mane,
Chratangna chuchekna kea amako,
Depantena wak dokna saa raniko.
A'bakuo a'gamna ba'a angde, ta'mane,
Sa'sampango misuna neng'a angsaa gitingne,
Na'chi bitong imbongra cha'bo amara,
Ang'ke grong jakrako kal'bo ta'mara.
Amara, ta'mara, gitinga, rania, ding dede ding !

KANGRA KANGRE ABISA

Saksa man'e cha'gipa mandeo demechik sakgni
gnangchim. Uamangko Kangra aro Kangre mingachim.
Salsao uamang abisa tiksa mona chironggena inc
koksi teritak kee chekke palitak ra'e chibimachi re'ang-
aha. Uamang chibimaona sokangoa chioniko chekkechi
kitoa chonbegipa etchaluk napaha. Uko galate chi-
kongaoniko kitoa on'tisa dal'kala etchaluk chekkeo
napskaaha. Indaken chikongantion kitdororoangoa
dal'batrorogipa etchalukrang chekkeo naproroangaha.

Uko nike uamang abisa kena ong'katroroangaha. Ja'-man kitiko uamang tora gita ong'pilgipa etchalukko nikaha. Ua etchaluk uamang abisako chikna rikaha. Uamang abisa krenge katangenba maari wedokdruao gakate dongnurikaha. Etchaluk uamangko nikjae mongma mateko nike ukosa rikangskaha. Mongma mateba kenjagoke katimmangoa a'anma daksokgijachi chianma kolgapgijachi katangmane unon ga'akange siaha. Aro etchalukba ga'akange siaha. Indakesa Kangra Kangre abisa etchaluk dal'gipaoni jokaha.

Uamang abisa adita salna burungjoljol brangro-roangaha. Unon uamang matcha chidual mangsako grongaha. Matcha chidual uamang abisako nike ka'sa-chake aganaha. 'Na'simang nang'man nang'pan nokchi re'angpilna skode gingchokdengni nokona re'angbo. Ua nasimangna dakchakaniko on'gen. Unona sokangahaon na'simang gisik rakbena nanggenne. Maina ua agital manderangna namen simsakbea. Namarara toarara cha'a ringanirangko on'gen. Uni gimin na'simang uko ka'sa-chakgipa ine nikgen. Indiba uade ku'siko bija bitchi, okningo matcha bisisa. Uni song hawa a'bri pil'sao donga. Na'simang re'angon uni nokko nikaigen, 'ine agane matcha uamang abisako wate re'angaha.

Uamang abisa gingchokdengni nokona re'angaha. Gingchokdengba uamangko niksoe kusi ong'bee nokchaksoaha. Gingchokdeng uamang abisana mema gorim jahako smilding song'e, do'do dore gipuko mitim jre jre song'e channe on'aha. Kangra aro Kangre abisa namen cha'napbeaha. Mi cha'man ringmanoa churengma bilsisni ong'ako bitchi chino man'ako ste so'o kamako

te'sa cheke on'aha. Abitang Kangrade 'matchani aganata gita tik ong'bebea ine chanchie cha'aiachim. Indiba nogipade mamungkoba chanchigija cha'ala ringiachim. Uni gimin abitang uko gisik rakatrongachim. Walo uamangna dring changrasako mesoke ba'ra kancha chu'onga gita on'e tuchina anne tarie on'aha.

Abitang Kangrade tusigija kenenba srik srik mai ong'gen, ine chanchie tusinan man'jachim. Indiba nogipa Kangrede mamungba chanchigijan tusiaiaachim. Adita walingangon Gingchokdeng dringsamona re'bae tusitokjokma ine uamang abisao sing'caha. 'Tusikuja ine Kangra aganchakataha' Unon Kangra nogipa Kangreko morekrek mochichie demesaaha. Indiba mikrakjachim' Indiba abitang se'ete puchine nachil salrekreke mochichie demesaaha. Indiba mikrakatnan man'jachim. Abitang chakate ba'ratangko dol'e mande dake donangenba kena amchakjae nogipa Kangreko gale dogo kachangako rasote srik srik ong'kate tingbang katangaha. Adita dongon Gingchokdeng dringsamona re'bataie tusiahama ine sing'etaiaha. Unon mamungba aganchaka dongjani gimin Gingchokdeng dringona napbae Kangreko gingtingchi oko su'e an'chi opaha. Abitang Kangrakoba krogen su'ataha. Unon ba'rako mande dake donanggipako naprotangpilenba wa'sean be'pruangpile a'o nangchakepile gingting ku'chotan kom'kupilaha. Indaken ua gingtingko salokbaon wa'seni adita matako man'e aro gingting ku'chot a'o su'tokea gita dakenba kom'kupilani gimin saknako man'enba ka'o nangbeenba Kangrako rikangaha.

Kangrade mesemani nokona katnapangaha. Mesema ka'sachake kok chikopdape donaha. Gingchokdenga mesemani nokona rikangoba nikjae gingting rim'roke noktangona duk ong'e re-bapilaha. Pring walsengahaon mesema Kangrako ma'ani paani nokona dilangaha. Kangra noktangona sokon mesemako mitele mi kokdok aro misikokdok on'e watatskaaha. Mesemaba kusi ong'e on'atako ole noktangona re'angpilaha.

*Kursiko bija bitchi, okningo matcha bisi dakgipa
manderangna mikrakbena nanga.*

BABE OKOT

Badiaba song damsao man'e cha'gipa aro ka'sagipa mande saksa dongachim. Indiba uni nokkol saksa pangnan uni gamrang gimikko man'gope katna gita cholrangko am'rongachim. Ua man'e cha'gipa mandeara a'baosa dongachim. Rang gamrangko an'tang baksa donrongachim. Uni jik dedrang aro gipin nokkolrang songosa dongachim. A'bao ua aro uni nokkolsan dongaiachim.

Walsao uni nokkol nokni sepang burunggrimo dong'e matcha gita mikoataha. Nokgipa matchana kene an'tang nokkolko okambeaha. Indiba uni nokkol kuchakgija batesa matcha dake sningbatroroaha Nokgipa maiko dake jokgnok ine sintimitingo Na'a matchaoni jokna skode chu'dapo am'bol dangrue so'enba onggarao gakate wal'ku chake dongnubo ine kenataha' Nokgipa

matchani aganata gita dakaha. Nokgipani onggareo wal·ku chake dongmitingo uni nokkolde noko nape pilak rang gamrangko rikae a'seni burung grimona ra'ange donetokaha. Rang gam gimikko bon'e ra'angtokmanoa an'tangba nokoni katangaha.

Ja'mano nokkol brangrroe okupuni songona sokeaha. Okupu ua mandeko nikon chike cha'na sikbeaha, Indiba ua miteo sing'chengesa cha'gen ine

agane sima niaha.

Manmana parapara.

A'dingchi chapa chapa.

Wagam wakengsisi,

Nachil matrengsi,

Bisikkromna bak,

Sadutangna jak.

'Goera uko knae mandena ka'sachake aganatjok, Akkaruna kobokna lau gonggedangnasa sima chaa.'

Untalsa okupu akkaru aro lauко cha'a Indiba mandekode chike cha'jaha. Unon okupu mandena wak doke aro chucheke on'aha. Mande cha'e ringe chu pke sarao griк mesae goera chanmitingo matcharang chike cha'na ine chabamitingo okupu an'tangni wa'cholrangko chake donsotokaha. Uko nike matcharang kene katangtokaha. Okupuni wa'cholranga ruatrangsa ong'achim. Indakesa da'ona kingking okupuni a'kol ku'mango ruat bang·ronga ine agana.

Nokkol okupuni songo adita sal donge Dandrakmani songona brangangtaie sokangaha. Dandrakrang dandrak, gostapo dalgap ine mikotokengachim. Ua dandrakni songko an'sengnikjac uoniba brangangtaisha.

Nokkol brangrroen dal'begipa chibimaona sokang-aha. Ua chi rikamo Bugarik Bugasil, Rabuka Rangani demechikkrang sarenchi ake cha'engako nikeaha. Ua manga mikkang bimang daknangbeachim, aro knirangba ro'robeachim. Nokkol uamangna mikchabeaha. Aro uamang baksa agangrikna jotton ka'aha. Indaken ja'mano uamang baksa songchi re'pana ine nokkol bi'aha. Uamangba uni bi'a gitan re'na on'aha. Uamangni songara chiningchisa ongachim. Nokkol uamangni re'ako ja'rike re'angpaaha. Ua nokkol chiningko re'angmitingo chi ringpekangako nike me'chik bisarang amani apani pakmaosa nangtinga, mamungba ong'ja ine aganaha.

Bugarik Bugasil Rabuga Ranagani songona sokangoa, nokkol namen an'sengnikbeaha. Indiba Bugarik Bugasilni demechikrangoni saksaba ua mandena mikchajaha Maina ua mandeara namen sakgisim ong'achim. Uni gimin nang'ko gital daktaina nanggen; uno ching gita sakgitchakosa dongani ong-gen ine mandena aganoa, an'tangko daktai rutaichina on'aha. Indaken ua mandeko wa'alo so'e chiripe nioa skangna batpilen simbatsrangaha. Uni gimin uamang uko a'ningni do'ka pil'atsrangaha. Mande an'tangko do'ka pil'atani gimin ka'o nangbeaha. Aro maiko dake a'jak soka'niko dakskana man'gen, ine ua cholrangko am'aha. Ja'mano ua uamangni namnikbee jilgipa babeokot ba dorekko nike, aro ua do'rekko tol'mikna mangsongaha. Salsao Bugarik nokgimikan noko dongjachim. Do'ka uko nike do'rekko sitec donram gringsambaona re'ange aganaha. Jong na'ade angna bate nitoa, indiba anggita skatang

rona man·paja walang salang gring ning·o donge mamung a·gilsakni duk sukkon na·ade uipanan man·pakuja da·nang! anga nang·na namen duk ong·chaka·Angko niboching, angade nang·ni a·songni do·o ong·paja, angade a·gilaskni do·osa, chiningni a·songara maikai ong·chongmota inesa nina bilrorobaesa ia songo·na sokbara aro nang·koba nikea. Hai, na·a a·gilsakchi angbaksa re·pabo. Maina a·gilsakchide jeko na·a cha·na ska ukon skatang cha·na man·aia aro skatang bilroroe ronaba man·aia. Na·a angbaksa re·ode cha·a raja cha·na aro donga raja dongna man·aigen. Mamung·naba na·a jajrengna nangjawa.

Do·kani agana kattako do·rok knae unbaksa a·gilsakchi re·pana sikbeaha. Aro an·tangko gringoniko watchina do·kana aganaha. Do·kaba uko gringoniko wataha. Indaken uamang a·gilsakona sokbaaha. Do·rek a·gilsakona sokbaon an·sengnikjaha. Cha·anirangna neng·nikaha. Chike cha·gipa do·oskarangna kenaha. Ua chiningni songchi re·pilna sikbeaha. Uni giminsa do·rek songtang chiningna ka·pake sintie skime miko·ronga ine agana.

*Indaka kamkon do·rekko do·kani mikrimtipe rimba
gita ine aganronga.*

WAKKI CHONGPROT

Skangni eha-songo Susumema Sangkildomani be'ani wilani salo pilak a'o ro'gipa sako bilgipa ma'rikkitan matchu moe, wak ole, merong mechu ra'e chu ole re'angtokachim. Wakki chongprotba do'po mikjretba wak bi'sa pe'gitalko mangsa ole re'angpaaha. Siang-gipa Susumemani nokona re'anggiparang sokangtokaha. Susumema Sangkildomako so'e galna ine bol ra'gipa ra'enga, ganchi rikgipa rikengachim. Mitamranga chu chekenga, mitama wak matchu den'e rate, mi bijak songtok chantokengachim. Chame apa bola gipi dakgiparanga dankroko dandane am'pok ja'groo asonge dorogipa doroe, mangtatgipa mangtate chu ringtokengachim. Song'gipa kam'seng kamseng ringgipa chet chat chetchat dakpilaiachim. Chukangipakon seng-wat bila gita, rimol enge mi su'akon me'ga onga. gita nikaiachim.

Song-man chanmano mi cha'china jinmako asongattokaha. Bakgitchak tutatako sagipa ram.a gita asonge malamako makkra jinma gita nikpilaiachim. Maina asongantini ma'mantin dokrok chimroke re'angtokani gimin kotok bang'beahim. Cha'sogipa cha'so-enga sualgipa sualengachim. Indaken mitamna tika mitamnade tikjaengachim. Da'nang! Wakkichongprot-nade wak ki'sangchinipak be'en tinsakosan mar'paiaha.

Untalsa da'ona kingking wakkichongprotara wak sipangjrot, wak sipangjrot ine jachae kontie mikoronga ine agana.

*Indake ong'a kamkon cha'gnia giso, agangni kiro
ine aganronga.*

DOMBE WARI

Skang chasongni salrango Dombe me'chikara saksa ba' nang chi' nange nitobegipa me'chik saksa ong'achim. Kni kasot dimrim aro mikkang sona chijim, ku'chil mandal bibal, wagam kitma bitchri seending do'do do'rimit gita, ragong bolbijakgita dakaiachim. Gipin me'traskarang baksa ropade, do'ka mandal ringa gita, noko matchu gaa gita nikpilaiachim.

Dombe me'tra sokahaoa ma'a paa saksa panteko chawari rime on'aha. Ua pante jiktangni nitoako panteskarangna, anti-a'king re'oba re'rimskarangna, a'jak a'gil rimoba mandeskarangna rasong chae aganrong'achim. Wa'den boldenna burungchi re'angoba, wa'arang aro bolrangko nie, srongdimdim takrengkreng nam-nambeoba ang jikni namakon sokja ine aganrongachim.

Salsao Dombeni segipa dal'gipa chibimani dram joljol re'roroe romitingo bolrangko nie, bolrangni namako aro jikgipani namako tosusae aganako Bugarik pante knadikaha. Mandede uko nikjachim "Uni jikgip-ara badita nama-ching'a bia. Bolna wa'anaba rasong dak-engara' ine Bugarik pante chanchiaha. 'Anga sandie nigen' ine mangsongaha.

Adita salni ja'mano Bugarik pante nambegipa sonani sandap ba sanggong (jaksan jorasako) dake Dombemangni songona re'angaha. Ua salo apalgipa sarao me'chik jinma mitangtangko damsan su'tokeng'achim. Bugarik pante uamangona re'ange aganaha. 'Jena ia jaksan tiktak nama, uan ia jaksan jorasako

ra·kamna man'gen.' Indinako knae me'chik jinma rimol dondingdange chaeckseke gane nitokaha. Indiba nap·tokjachim. Ja·mano Dombeba gane nioa, unade tiktakan namachim. 'Ia Jaksan jorasa nang·nin ong·jok' inc agane Bugarik pante re·angpilaha.

Dombeni segipade antichi re·angani gimin uarangko nikpajachim. Dombeo demechik sakgni dongachim. Saksade dal·kalaha, saksade dambolbamitingchim. Dombeko desakgni ba·ahaoba ba·a ba·jagita me·tra ajak·ajak nikaiengpitichim. Mi su·mano Dombé dedrang sakgniko rime chibimaona auna re·angaha. Ua dedrang sakgniko auatchenge dram an·chengo done chi tu·kalachi re·ange aumitingo Bugarik pante chining gita re·bae jakgitoko rim·e ra·angaha. Danang dedrangde nikriksrapjaha.

Ma·gipako nikjae dal·kalgipa bi·sa 'Ai, Ai' inc okame grapaha. Nogipa chongipaba abitangni grapako nike grapaaha. Dedrangni grapako knae ma·gipa aro Bugarik pante chiningoni ong·katbaaha. Magipa an·chengona gadobae bi·sana sok kanaha.

Bugarik pante adita chel·ao a·songe sengtimaha Angade na·simang baksa nokchi re·pilna man·jawaha. Angkode Bugarik pante sekaha. An·tangni dongram·china rimanggnok. Nang·pa antichini rebapilon aganbo. Nonoko name nirokbo. Sok okkrie grapode ia bispona ba·barongbo' inc grape agane dedrangko peo ku·dim·chotchote sakgnian chiningchi napangaha. Da·nang demechik dal·kalgipade nogipako ba·e mikchidek dake nirikaha. Nogipako ba·e nokona re·bapilaha. 'Aikode

mande saksa chiningchina rimangjok' ine bi'sakarangna aganaha.

Segipa antioni nokona sokbao, jikgipako aro dedrangko nikjae sikkurang bakrang dake nukeaha. Pagipa demechikko okamaha. Demechik pagipa re'baha ine uie gisiko kusi ong'e nokona nogipako ba'c re'baha. 'Nang'mara bachi re'angaha?' ine singaha. 'Aikode mande saksa chiningchi rime katangjok. Nang'pa sokbahaon aganbo. Nono sok okkrie grapode chisamona ba'barongbo' ine agananga. Uko knae segipa dongtopilgija dakpile ka'o nangaha. Ua dedrangna antioni ra'bagipa cha'anirangko cha'china one, antangni mil'amko wil'aha. Bi'sa chongipaba sok okkrie grapna a'bachengaha. Uko nike pagipa dedrangko rime chisamona re'dilangaha. Pagipa bi'sarangko chisamo donange, antangde mil'amko ra'e kasi tilu grimo time dongsoaha.

Bi'satangni grapako knae ma'gipa Bugarik pante baksa dram an'chengona re'baaha. Ma'gipa bi'sako rime ku'dime an'chenga asonge sok kanaha. Bugarik pantede kasi grimchi janggalate asonge sengtimaha. Dombeni segipa rang'san ka'kame chaprakbae jikgipani jakgitokko rim'enba, jaksamsachi Bugarik panteko mil'amchi denataha. Indiba nangrikjaha. Rang'san chiningchi nape katangaha. Agre sengnappija dakaha. Ua jik dedrangko rime noktangona re'dilbaha. Adita jarangna songo dongdilaha. Indiba gisiko dongsiksak cha'siksak dakkamaiachim. Maina basakobade maiba a'sel ong'genma? ine gisiko kena dongachim.

Indaken ua songoni adita chel'gipa a'brirangchi-duulgipa jatchio a'patal a'palgipaona katdilahanga. Ua a'patalo dal'begipa gitding bolma pangsa gnangchim. Ua bolo ua nambegipa borang nokko srek done pakma wendrone jik dedrangko dongdilaha. Da'ode kenchakani griaha ine ua chanchiaha.

Adita jarangni ja'mano Bugarik pante sandibaro-roc ua biapko nikaha. Adita salrangni ja'mano a'patal gimikkon a'ningchi. a'be'pruatangaha. Da'nang gitding bol, borang aro manderang gimikan napsrimangtokaha aro dal'begipa aro tubegipa wari ong'srangaha. Ua wariara da'onaba Emangiri Adoko dongengpiti. Ua warikon da'ona kingking 'DOMBE WARI' ine mingenga.

Agrepile rasong aro gaora dakna nangja. Indakgiparangko miteba mandeba salona ra'ona ine aganronga.

NIRE-SINJE

Nire-Sinjeni ma'gipako Okgilma-Chambilma aro uni ambitang bitchitangko Balongre Bolongjok mingachim. Nire-Sinjeni pagipa songanoka, jangki-do'gani o'gija-pe'gija dake dongipa a'song rakgipa chiga-nam-gipa Abet Rangge miteni dongram a'song chigako a'ba o'aha. Ua biapko Abet Rangge mitena kene a'an o'tokja chigan ringtokjachim. Skang chasongrango uko o'gipa manderangde sironga ine aganritinganirang dongachim. Indaken ua a'ara bolang salang mrong-dimachim, bolan wa'an andalsim dakpilachim. Nion ante srengsreng, napnan jrimjrim dakachim. Do'bakan

wenwanwenwan, sengwatan chetchat dakgipa biap
ong'achim. Ua indaka biapko Nire Sinjeni pagipani
a'ba o'mitingo Abet Rangge miteni dongramsa ong'a
raka-chiga-dal'a, daknabe ine ka'sae beng'tokpaachim.
Indiba manigija o'drae bolcham-wa'cham wa'cheng
rampilaha.

Adita sal dongani ja'mano Nireni pagipa sabilonge
siaha. Da'nang jikgipade oku chango rabita gnangchim
Segipani ja'mano cha'a ringa gri walang salang bika
adram beari, mikchi chiwaring ong'ari nini do'oldue
sinte-do'pilgime kalimaha.

' Nokking nagipuoba sawa jotapkugen
Nokni krong ja'choto sawa songjotpagen.
Sara samsi dikako bakrokgipa dongjajok,
Noksam nokgil burung srau gose dakainok
Nokrik nokdake sawa on'pagen anggitana,
San o'e on'ako gampagen segri tanggitdikna.
Mama ada gri aro ma'de ma'jong,
Wanga pa' dongpaja gri ang'jong.
Gipinni jama busruo dongna nangarignok,
Jawao nokol nape sala siaignok.
Salsisi dukko chake dongpagen ong'oba,
Maikai tangdilgen angde atchioba.
Ang'kawade ja'reangjok Balman a'dokona,
Ja'sokangjok ang'kuride Chitmang chigana.
Matchu boldak ka'ramo ja'nengtakangbo,
Memang me'sal cha'ramo chadengdikangbo.'

Songgimikni a'ntangtangko so'mano, 'Je ong'oba
angse sagi gita sisranggen' ine segipa sagini o'ang-
gipa a'ako so paha. A'kilna nanggijan a'ako namen
kamahachim. A'bao do'rama sale misirangko satpaha.

Mi merakku, tama taring, e'ching rasin aro pilak satna ge'na nangarangko dakpaaha. Adita salni ja'mano pilak ge'gimin a'bao cha'batokaha. Songgimikni a'barangona bate nambatachim. Da'nang Nire Sinjeni margipa dukan gapengoba on'tisa gisiko kusi ong'a-niko man'paaha.

Mi misirang aro pilak ge'giminrang nambabeengoba, Una bang'a dukrangba sokbaskaha. Burungoni matchok me'samrang walantin re'bae a'baoni mi misirangko cha'erongachim Uarangko nike ua namen dukko man'aha. Da'nang ua grap grape walantin tusina man'pilgija matchok me'samrangko a'rikna nangaha. Samsachiniko arikoa sangipinchiniko cha'ska. A'kosakchiniko arikoa A'kisangchiniko cha'akara Aiao! da'nang me'chik segri, walo, tusinapgija salo dongsinapgija dake skim ma'ame aganaha.

'Segri anga riko man'jae, a'bani matchokko bon'e saoba so'otode, on'genchim detangko. Me'chik ong'ode, jika dakaibochim. Me'a bi'sa ba'ode nokkol itbochim.

Walni wal ka'o nange agane rikronga,

Walantin oko kea, detangko palronga.

Da'nang walantin matchok me'samrangko a'riko amchakjae oko kea detangko alonronge aganrongako ku'simpel (matcha) knadikaha. 'Na'a nang'ni agana gita matchok me'samrangko bon'e chiktokode detangko on'chongmotbegegenma?' ine matcha me'chiko sing'eaha. 'Oe anga matburung, manderang aro jerangnaba ong'bo detangko alonjok pipakjok' ine aganchakaha.

'Atcha anga dakgen' ine matcha uni a'baona wal-
antin re'baronge matchok me'samrangko bon'e chik-
tokaha. A'baona matchok me'samrang re'bataijaha.

Banggija salni ja'mano ua bi'sako deansengaha.
Ua me'chik bi'sa ong'achim. Uko ma'gipa Nire Sinje
ine bimung mingaha. Da'nang bi'sako an'seng baljoke
man'pahaoba kusi onгани pal batesa dukko man'bataha.
Maina bi'sakoara matchana ku'pakgimin ong'achim.
Aiao da'nang, bi'sara do'onjekjek dambole nampabea-
chim. Ma'gipa matchana on'atna ka'pakpilaha. Maina
ku'pakmanjok ine gisiko duk man'aha.

Adita jarang re'angani ja'mano matcha Nire Sinjeni
ma'gipaona re'baaha. 'Da'o nang'ni ku'pakgimin gita
nang'ni deko rimna re'bara' ine matcha aganaha.
On'atnaba ka'paka, on'atjaoba matchana kenani ong'a.
Jeba ong'bo bandil-bandil dake rama re'baenggipa
demechikko pe samtangtango ku'dimchotchote grape
matchana on'ataha.

Matcha 'bi'sakoara mai bimung mingaha' ine
ma'gipao singaha. 'Nire Sinje minga' ine ma'gipa
grape aganataha. Matcha bi'sako rimange gualna kene
Nire Sinje ine mingroroe re'angaha. Matcha adita
re'angon do'grik matchako chadike to'tro ong'e jagipue
andildilaha. Matchaba to'tro ong'skae Nire Sinjeni
bimungko gualaha. Mingtaitaie nioba man'jahani gimin
Nire Sinjeni ma'gipaona re'bapile sing'etaiaha. 'Aiao
na'a! Nire Sinje mingbo. Angona re'bataie angdeni
mikkangko nikatnabe' ine grape aganaha. Matcha
gualna kene gisiko mingroroe adita chel'bate re'ang-

taion rama samo balgitchak mangsa chirore biteko cha-soengachim. Ua rang-san matchako nikdike hop-petpete katangoa, matchaba jagipue Nire Sinjeni bimungko gualtaiaha.

Da'oba matcha Nireni ma'gipaona re'bataie bimungko sing'etaiaha. Ma'gipa detangni mikkangko niksotaie dukni baksa duk ong'daptaiani gita ong'oba chakchike mikchin baksa bimungko minge agantaiaha. Matcha gisik rakbate re'angenba an'tangni dongram biapona sokangaha. Ua Nire Sinjena simsakbee nam-arara toarara cha'anirangko salantin on'e alduaha. Nireba be'en bimang gilsrebae dal'baroroe nitobaha.

Nire Sinjena jakona sandap (jaksan) rangko gitokna, ripok do-katchiko, nachilona sonarangko aro ganding chindingnara mugading selbin okningko ganatchinataha. Do-do do-rimit gita rama bolbijak gita, kni kasot dawiljang, mikkang sona chijimjim, wagam kitma bit-chri se'ending, kuba e'ching similding aro ku-chil mandal bibal gita dakaiachim. Ua chasongni Me'chik skarangde soktokjachim. Jegitaba nambo ching-bo da'nang matchani jikgipa ong'aiaha.

Salsao Nire an'tangni gimin matchao sing'aha. Matcha una sulsul rongtale agane on'tokaha. Nire uarangko knae ma'ako nikna sike aro ka'pake namen grapaha. Matcha an'tangan jajrengpilaha. 'Ha gose! da'o anga matchani jakoni jokna mamung chol dong-jaoba, changsade angnaba maiba naljokani sal ong-papaba donga' ine sintie aganaha.

Changsao matcha Nire Sinjeko 'Dimrimbri patafo, Palwang-ading a'chuo cha'enggipa antiata, chigin ka-ona re'e nipanakama?' ine singaha. Maiko anti atachigin ka'a minga aro maidakmancha uko nipana re'pagen' ine aganaha. Ua antikoa manderang baksa aro matcharang baksa cha'rongachim. Ua antio bilagipa-wasagipa manderang gando makkal pale dakgrikrongachim.

Songantini nitogipa me'trarang nama nama bararangko gane chine jakona, gitokona aro nachilona gamchatgipa gananirangko ganne re'batokenba mikkang bimang nisaronga aro tosusaronga. Jndake dakmano panterang aro me'trarang mikchatang namnik-atangko jik se basee ra'rongachim.

Nire-Sinjeba segipa matcha baksa antichi re'e nipana ine bara muga oliko ganne, chinna selbin okningko chinne gitokkona ripok dokatci, jakona sonani sandap aro nachilona sonani tengkap ganne matchani mikkang mikkang re'angaha. Nireko salariona bate changgni nitobate nikpilaha. Uamangni antidamona sokangna skangan bang'bea manderang antidamona sokbae dongengachim. Uamang biapona sokangon pilak manderangan matchako aro Nireko chatimole nitokaha. Nikatgijagiparanga changchrae gitok dee niaha. Mitamrang chuakalgipa biap-rangona re'ange aro gipinranga bolrangko gakate niwataha. 'Badia songni, sani demechik, banang-chinangen bebejok da'nang! Metrapitima, sea-paa dongjokma? ine mitam manderang singrikriktokaha. 'Mettrade ong'jajok,

Matchani jikgipasana' ine mitam manderang aganaha. Aiao da'nang, nama nampara matchani jikgipasa ong-aiahaode gimaijok nasaijok' ine aganaha.

Bilakgipa-wa'sagipa panterangoni mitamde gisik-tangtango seke-bale katnaba chanchipilaha. Indiba matchana kentokesa pa'tokjaha. Indiba iechi uamang re'a uchinan pantenrang ja'rikangaha. Biap damsao matcha Nire-Sinjeko donange anti cha'roroangaha. Indakmitingon matchi jolni Napak Bolmoramni Raka Marak minggipa Nire-Sinjeko Seke-bale katangmanjok. Adita ruutani ja'mano matchaba biapona re'baoba Nire-Sinjekode nikejaha. Mikwang-pewang dake uchiniko ichiniko am'e nioba man'jaha.

Anti cha'gipa manderang 'Nire-Sinjekode seke-bale ra'angjokna' ine agangilgilangaha. 'Sawa badia songni mai minggipa seke-bale katangjokna' ine mitam manderang sing'aha. Matchi jolni Napak Bolmoramoni Raka Marak minggipa sekangjokna' ine saoba saoba aganaha.

Matcha uko knae wagam chikmijilpile ka'o nange aganaha 'Da'mo, badita bilaka-wa'sara anga nigen' ine ku'chinge ku'bososo dake songtangona saksan duk ong'e re'baaha. Noktangona sokangoa, da'nang matchade dongo dongtogija, cha'o cha'togija dake noktangkong senggrrangrang nikaiaha. Noko salsa salgnimang dongari matcha Raka-Marakko gro dingna sandiroroe am'baaha. Uko nikeahaon matcha salsni walsni ong'pile dakgrik-dinggrikaha. Indiba da'nang matcha, Raka-Marakko amjae katpilna nangaiaha. Ka-sagimin jiktang Nire-Sinjekoba man'piljaha.

Unsal intalsa da'ona kingking matchani aro mandeni ma'kring bobil ong'grike so'otgrikaniko dakenga ine agana. Skang chasongode ringe cha'e pekoba, bobil-ginnalko dinggrik-dakgrike amoba, 'Kae Marak Goera' ine agane torena man'ja ine aganronga.

Nikmangimin aro uimangimin manderangni aganrongako aro beng'giminrangko manina nangchongmota Manigija dakdraode an'tangna, jik dedrangna, jatra aro a'songna dal'bea dukko on'gipa ong'a.

MONGMA

Skangni chasongrangode mongmani jatba sundul dongjachim. Gipin matburungrang gita ku'aik aro ki-me dongpaiachim. Changsao mongma chi ringna chibima-ona re'ange ringengachim. Unon rang'san chiningoni Pusil (aringga) dal'gipa uni ku'chilko chikkape chiningchina salangna dakaha. Mongmaba rang'san to'tro ong'e a'gaona gakatna dakaha. Indiba pusilko salbitbana man'jachim.

U'mang an'tangtangni bil ama gita salgrikna jotton ka'aha. Indiba man'grikjachim. Salgimik ong'na-sipike salgrikani gimin mongmani ku'childe ro'roroangpilaha. Indiba watgrikjachim. Ja'mano mongma a'a rakgipao ga'chatna man'e bil gimikko krengprete saloa pusil amchakjae watdimbangataha. Da'nang mongmade sikkbileke ga'akpilaha.

Untalsa mongmani ku'chilara ro'kame dongaisha. Indakesa mongmani jatara da'ona kingking ku'chil ro'a.

Ukon sundul mingenga. Sundulni ku'choto a'kol dong-gipara pusilni jakskilchi puchine salani gimin konggrang dakaha. Mongmarang gipin matburungrang gita chiko bame ringrongja. Maina pusilna kena. Sundulo kong-grang dakgipaosa chiko ra'e ku'siko donatesa ringskara Sikomprete ga'akesa da'ona kingking kom'chika gita daka ine aganani.

MESE ARO PERU

Badiaba biap burung damsao bang'a meserang dongachim. Uamangoni mangsa gisik gnganggipa dong-achim. Ua meseskarangko dilna changbea. Uni ku'patia kattarangko uamang manirongachim. Indaken meseska-rang uko Nokma songe donaha.

Salsao okkrie roamjojogipa peru mangsa mese jinmako nikdikeaha. Mai cholko dake uamangko chike cha'na man'gen; ua chol mingsako chanchiaha. Mese-rangni dongram sepangni burung grimo peru jaksam-sako dedoe, skoko salgichi songdoe aro ku'sikkoara ku'ange dongaha.

Attam salniangon mese jinma cha'amachini re'bae peruko nikdiket kaha. Uamang nikarin aiao inmantokaha. Gisik senggipa mese Nokma peruni sepangona re'ange singeaha. 'Nangni bimung mai?' 'Angni bimung mite' 'Nangni jak samsako maina dedoa?' 'Angni ja'a jak ge'briko a'ao dontokode, a'gilsak angni jrimako amjae jingjenggenchim. 'Maina ku'sikko salgichina songdoe?'

'Salko olakia bi'enga.' 'Maina ku'sikko ku'anga?'

'Balwako ringenga balwakosa angade cha'e ringe tangenga.

Unon gisik gnanggipa mese Nokma mesekatangna,
'Ia perude rongtalgipa mitea, an'ching uko pring
attam olakirongna nanggen' ine aganprakaha.

Indaken meserang pringattam uko olakina re'angtok-
aha. Indiba jamanchake olakina re'anggipa meserangko
sriksrik mangprakprak chike cha'rongenba komiroro-
angaha. Uko nike mese Nokma gisiktango chanchia
ong-kataha. 'Iano maiba a'sel gnang. Sandie'nina
nanggen.' Mese Nokma time niaha. Unon ja'manchake
olakina re'anggipa meserangoniko mangprak : chike
cha'rikenga ine nikaha. Peruni jaksamsako dedpe
Salgichi ku'ange nidomitingo bildoe balwa ramani
ja'dilko nie gitokbuko chiksotaha. Peru mamungkoba
dakna man'jae apsan biapon gitile siaha. Mese jinma
peruni be'enko cha'e bon'ataha.

Tol'a aro togianichi adita salrangna namgniko
an'tangna dakna man'a man'ade, indiba dongkamatna
man'rongja.

*Indakakon matkoltangon gipua, wa'choltangan
bu'a ine aganronga.*

WAKSO

Skangni chasongo changesao indake ong'aha. Song
dingtang dintangni a'kingni nokmarang minga kam
dal-beani gimin nokma saksani songona melang-
dongna re'angtokaha. Nokchaksogipa nokma nokma-
skarangko mande ra'e cha'at-ringate melaha-saldongaha.

Uamangni songtangtangchi re'angpilani pringo nokma nokmaskarangna ka'sae wakchanggipek kasi dal'gipako su'e songtangtangchina suale ra'angchina on'aha. Indiba pilakan nokmarara ong'tokani gimin saksaba kae ripetokna, ba hai ra'e tete suale ra-srangna ine agancheng kumongchenggipan saksamang-ba dongjachim. Indaken uamang saksasakgipinko nisenggrikari dongtokaiaha. Nisenggriken saljatchi ong-angpilaha. Ja'maño uamang saksasakgipinko rot sakgni rot dake re'rotrote songtangtangchi re'angtokaha.

Wakde biaponi so'gramaiaha. Ua biapkon da'ona kingking 'Wakso' ine mingkamenga. Ua biap Bajeng-doba jolchi donga.

Uandake songni ba jinmani dakna nanggnigipa kamko dakani ong'on, 'angade dal'gipa uigipa mande ong'a, dakna kraja. Uasa chongipa mande dakna krara ine pilak dakna nangbegipa kamko dakna nisigrike bonataiode mamungba namgni gri. Nisigrikija dakanio namgni bang'bea. Ua gitan nisigrike dakgijanio gima-aniba bang'bea.

Hai nisigrikigipa dakna nanggija kamko ka'na.

BOLGRO

Chengoni chasongode cha'kal ringkalgipa A'chik manderang antangtangni dongram nokrangko ro'roe rikrongachim. Indakgipa nokrangni krongrangni dal'dala bipel mikgittam ba mikbri apala Mande sakgni sakgittam dake dongnuna. man'pilachim. Uandakgipa

nokrangni bolgrorang dal-dala aro ro-beachim. Agan-rongani ghang. 'Akongani chodape rika. Chiringani ga-bate daka.' Maina chengoni manderangde dal-dala aro bilakachim. Uamangni jakpongangan da-ororoni mande dal-giparangni ja-ping gita dal-achim. Agan-ritingani ghang. Da-oba A-chikrangni badiaba mahario skangni manderangni jakpongo gangipa jakail manggot dongenga. Ua jakail manggolara da-ororoni mande dal-gipani ja-pingo sikkroke niode rongrangpila ine agana. Ua chasongni salrangode gangguan matchok gita dipblokan do-ga gita aro ru-ratan medop kaani keheri gita ong-pila ine aganritingani ghang. Uni gimin nokrangba dal-dalna aro ro-na krabea.

Indakgipa nokranggo jatchio chu-dap gatgipao wa'al so-ode nokkrachi ba nokgilchi donge nistode, wa'al-chingakon jret jret nikaiaachim. Da-oba badiaba jol-rangode nokrangko adita ro-rok rikkuegipiti.

Chengoni chasongo badiaba song damasani mande saksa nok rikna dokrobegipa dal-begipa bolko bolgrona den-pee sol-aha. Ua bolgroko ripena sakchigni ba sakchigittamba amjawachim. Salsao ua mande song gimikni manderangko ajak rime ripeatna okamtokaha. Songgimikni measarang bolgroko ripena re-batokaha. Bolgro sol-ram biapona soktokon aganaha. Hai re:-bagipa gimikan ripetokna nanggen. Ong-jaode amjawa' ine agane, mitam ja-pangchi mitam rikechi aro mitam jatchirango damsan ripetokaha.

Indiba mitam manderang changroa, mitam man-deranga chakandikani gimin paktre apsan ong-na man-jaenba changrogipa manderangosa nangtokbataha.

Chakandikgipa manderangni pakkreode nangesarangjaha. Indiba, uamangba ripepaengako mesokna gita pakkre-tango nangatna susite krongkrotaha. Indaken bolgroni jrimamung chakandikgiparangni susitee jrimdapbata gita dakahani gimin ripegiparang amchakjac rama bikbeon ongale galna nangaiaha. Nokona soke ripe-angna man-jaha. Mai ong-anigimin jrimbatata ukoba uina man-jaha. Maina pilakan ripetokachim,

Dakgnigipa kamrang dal-oba, chonoba aro nambe-gni ong-oba, pakkre apsan ong-gija gita, dakgipani bidingsa dakaiode, dakgijani bidingde dakpajaode chusokaniko man-rongja. Ku-cholsan dakosa chusoka-niko man-ronga.

'Hohoesa pakchara susongesa wegara,' ine aganronga.

ANTISANI SALRANG

Skangni gitcamni salrango Nongchram a-jao Amin Jamsing minggipa mande dongachim. Ua Dekbik wari tugipani sambako a-ba o'e game su'e cha-achim. Ua warini sepango ua jolni songrangni cha-ronggipa gitcamgipa anti dongachim.

Ua Dekbik wari tugipao Bugarik Bugasilni dongkamgipa wari ong-achim. Ua antiko bilsiprako changpraksan cha-rongaiachim. Changsao Bugarik Bugasil jaksitangko geprak prak rim'e warisamo a-songe, antisani salrangko channengako Amin Jamsing knadikeaha. Ua sruk sruk burung mitino dongnue knatimaha.

Bugarik Bugasil antisani salrangko indake ming-engachim.

- | | |
|-------------|-------------|
| 1. Griso | — Sombar |
| 2. Abeso | — Mongolbar |
| 3. Airo | — Budbar |
| 4. Mechobar | — Bristibar |
| 5. Naringao | — Sukurbar |
| 6. Sanicho | — Sonibar |
| 7. Chigicho | — Robibar |

Ia chanani salrangko songona re'ange meapa-skarangna agane on'esaha, Indaken pilakchinan gipangroroenba chanpana a'bachengaha. Skangni pagitchamrangba mingba chanbaaha.

Iarangko an'chingba jakkalpajaoba uipana nanga.

BILSINI JA-RANG ARO KARIRANG

Skangni chasongni salrangko burung bolgrimrangko pe'e wang'e game su'e cha'chenggipa mandede A'chikrangoni Bonepa Janepasa ong'achim ine agan-ritingbaenganiko an'ching knarongenga.

Bonepa Janepa Sokadam a'jao donggipa rongpatal dal'gipako wilwile a'ba o'e so'e misiko satchengaha. Misirang minahaen uarangko ake chimongoa, misi kokdokko man'aha ine agana. Untalsa da'ona kingking misi kokdok a'bri ine mingenga. Ua jolode uan chubatgipa aro niksenggipa a'bri ong'a.

Ua a-brioni ong-katgipa chiring dal-kalgipa dilsa donga. Ua chiringaamo Bonepa Janepani rang don-ram biap dongenga. Uko niode rang gitan nikaia ro'ong pilaha. Uko kinoke niode jak ro'giparangkon pakkol arek ong'a

Minggipin aganani donga. Misi Apalpa Saljong Golapa, A'ni Apilpa Chini Golapako burung bolgrim-rangko pe'e wang'e cha'china, mia, misi, ta'a, jalik, baring, e'ching rasin ge'e game su'e cha'china ku-sikkie kurarone on'aha. Untalsa an'ching A'chik pagit-chamrang a'dok a'king kange chiring chinga suale, mahari tangtang donge chasongni chasongna game su'e cha'baenga aro dongbaenga.

Bonepa Janepasa bilsini ja'rang aro karirangko mingcheng-donchengaha ineba agananirang donga. Ua indine mingcheng-donchengaha.

1. Gal'mak	ja.....	March
2. Me'bak	ja.....	April
3. Jagro	ja.....	May
4. Sogal	ja.....	June
5. Jagap	ja.....	July
6. Jamedok	ja.....	August
7. Mepang	ja.....	September
8. A'ni	ja.....	October
9. Berok	ja.....	November
10. Kilok	ja.....	December
11. A'wit	ja.....	January
12. Wa'cheng	ja.....	February

Pagitchamrang ia mingani channanirangko kranibae jakkalbae bilsini aro karina krae ja'rike game sure cha'be dongbaha. Ua gita apean nangni an'chingni jakkalenggipa jarangko sechapaha.

Bilsini karirangkoba Bonopa Janepa chanchien aro kraen donaha : Iarang gita.

- | | |
|---------------|----------------|
| 1. Sinkari | 2. Bandon kari |
| 3. Palin kari | 4. Ding-kari. |
| 5. Wachi kari | 6. Arak kari. |

Iarangkoba chasong gitichamrang kraen jakkale bilsini jarang aro karirang gita ja'rike dakgni kamrangko dakangaha. An'chingni chasongoba jakkalenga. Chasong gitichamrangni kamrang aro bewalrangkoba u'ipana nanga. Nama bewalrangko ja'rikuna nanga. Namgija bewalrangko ja'rikpana nangja.

ME-MANGRANGNI CHANANI

Asa, Agin Jora, Jogin, Bina, Kawa, Ona, Ongen, Olasi, Gangget.

Me-mangranga iarang gita chanronga ine pagitchamrang agana.

KALGRA KALKAME

Kalgra Kalkame Daranggiri A'songo Atkong Adilang Termatchi Pongro, Ildek Chisamo, Asro a'bri Songdong A'chae dongachim. Uno dongmitingo Kalgra Kalkamene namohiktang nonotang Kalmé Smik

Smik, Rume doldol dongachim. Uamang Anang Dikang Wariona su miksue, ja'an'chinnek-jakan'chinnek nate rojole Wario bang'bea na'tokrangko nikaha. Ua wariara Wajakan Salja, Warian jasengja aro Chitalan janikja-chim. Mai cholko dake na'tokrangko rim'na man'gnok ine mamatang Kalgra Kalkameko aganeaha.

Mamatang re'bac nioa na'tok bang'ako nikeaha Mamatang namchiktangko aganaha. Na'tokrang gipin warichi katsojana gita ia chion dongtimsobo. Anga makkal a'gipiko, ru'te bolwariko am'ekuna. Makkal dokmikna ru'te mookna gita, ine agane burungchi re'angaha. Namchiktangrang wariko nitim dongtimsoaha

Indake dongtimsomitingo Durani Imbani depante-rang Okbong Jada Waki Wanelmang nikdikeaha. Uamang Kalme aro Rumeko chike balangaha.

Kalgra Kalkameba makkal a'gipiko ru'te bolwariko man'e wariona re'baha. Indiba namchiktangrangko nikejae mikgranggrang nikeaha. Kalgra Kalkame ka'a suang mikchi jingjang namchiktangrangko okamrroe sandibeaha. Da'ang, mamung namgni dongjaha. Ua aganaha, A'an matcha chikoba chinkode nikgenchim. Chini buga ra'oba dram samsa be'genchim. A'oniko prem, Chioniko chem, am'e sandie nioba mamung chinrangkon man'jaha.

Kalgra Kalkame ja'mano gisik ra'aha Haida, Durani Imbani dedrang Okbong Jada Waki Wanelan re'grong re'namsange chike bale cha'aakon. Uamang dakjaode sawasa dakgenchim. Jeba ong-bo urina man'na gita anga Durama Imbakon ma'nok cha'a dake sandie nina

nanggen ine chanchiaha. Ja'mano ua re'ange ma'nok cha'eaha.

Durama Imbama Kalgra Kalkameko beng'e aganaha. Na'a re'chidik rikalbong (subudam ki'gongdam) chi re'nabe ronabe. Jongbu jong'gitangko dona g'ang, nang'na namjawa. Durama imbani noko dongjamitingo mai mai ong'chongmota ine je ong'oba ong'china ine drae re'chidik rikalbongchi re'ange nioa, nogipa nam'chiktang Kalme Simik Simik Rume doldolni chengkna mikseako kuari wa'se donako nikesaha. Aiao; Durama Imbamara an'tangtang indake dakesa angko tolpnike roaha ine duk man'beaha aro ka'onangaha.

Da'mo Anga Durama Imbamakon dakgrik dinggrik-griksranggen ine kurchinge Kalgra Kalkame songtangona re'bapilaha. Adita saldonge Kalgra Kalkame Me'gam rugipa Badaka Dambasu Silkamalchi mil'am dokatna ine re'angaha. Me'gam Badaka Dambasuba Silchi Wa'megimuko dare do'regipuko silchi sike dokataha. Ua mil'am baksa waka wakmilako doke srom dipdula, kapinggitdoe mesal cha'china ramaona on'ataha. Kalgra Kalkame uarangko ra'e re'angaha. Rama tong'saona sokangoa mesal okkrienba mesal cha'na ine wak be'en, on'atako brengna gita mil'amchi wa'naruko den'oa, silchi wasre dare wagokaha. (warippene be'aha.) Kalgra Kalkame Me'gam Badakka dakgipachi rugipa Dambasuchi dakattaina re'angaha.

Ua ramao Tilareng Raipa-Pasareng Rajapako gronge aganaha. Angni mil'am dokatgipade Silchi wa'megimu dare waongipuko dokatara namjajek, lachi anga maikae Durama Imbamako dinggen kogan.

De'on matjawa, su'on bu'jawa. Uni gimin dakattaina re'angenga ine aganaha. Uko knae Tilareng Raipa Pasareng Rajipa aganaha. Angna mil'am dokatspa silchian silgittingan, dare wa'bisan dongengpiti, ukon silchi sike dokatchina aganbo ine kurarone donangaha.

Kalgra Kalkame Me'gam Badakka Dambasuona re'ange, nang'ni angna mil'am dokatgipade silchi wa'gokaia dare wagipuaiake. Silchi silgitingko wa'bisako dokgitale on'ataipabo ine aganaha. Uni gimin Tilareng Raipa-Pasareng Rajepana dokatspa silko dokattai on'ataha. Unbaksana waka wakmilako dokattaie sromdipboe kaping gitdoe cha'mesal cha'mewalchina (mesal me'atam) cha'china on'attaie aganataha. Na'a Sone bapjaruruko, A'ding tim'boririko nappake dopake re'ang roagnabene. Uno ja'nengtak asongdimangpanabe, nang'na namjawa ine ka'sae agane on'ataha.

Indiba Kalgra Kalkame mamungba simsakgija nappake songko re'angaiaha. Unon ua songni manderang nirike, apade boningde, mosade bachisa re'enga doenga. On'tisa kandiksana ja'nengtakangbo asongangpabo ine aganaha. Kalgra Kalkame beng'ata kangatako manigija asonge, agandipbetgrike roaha. Uni simsakjamitingon, uni wak been ra'bagipako srik srik ra'enba raka wagam chongget, ganjapa ki'me chonggetkosa sromdipboe kapinggitdoe donskaha Kalgra Kalkame uko nikjachim. Ua songara skalni kama'ni song biapaa ong'achim. Unasa kenchake ka'sae beng'atpaachim.

Adita neng take ua songoni Kalgra Kalkame re'angaiaha. Adita re'angon chisamona sekoa mesal

cha'na ine brengna ua aromeko enge nios, raka wagam chongget, ganjaparogetsaa malbrang maluu katangakosa nikaiaha.

Iarangko nike Kalgra Kalkame Me'gam Badakka Dambasuko an'tangko tol'e on'steke roata ine ka-onangbee aganaha. Anga Durama Imbamakon dakgrik dinggrikgijan Me'gam Badakkako Dambasukon dakgrik dinggriksranggen ine mangsongsrangaha. Indaken u'iataha. Me'gam Badakka Dambasuba ra'biako ra'chake Me'gam ritcha mande tasiko rimbite mil'am aippi ra'toke re'batokaha. Uko niksoe Kalgra Kalkameba' amjana kenchake Damboo a'song donggipa a'bri totsaona katange dongsoaha. Ua a'briara samsachi rong'bare, Sangipinchi Ambare chicho, bolkaru dekdo minggipa tu'gipa dalgipa wari dongachim. Uarangna ka-dongen Kalgra Kalkame Me'gam ritcha mande taaiko, bipa ong'ode chababo, bima ong'ode pil'angbo ine ra'biataha.

Uko knae Me'gam ritcha mande tasi, Kalgra Kalkameko dakgrik dinggriknan re'baha. Samsachika re'na dakoa rong'brak rong'bare, Samsachiko re'no am'oa, Ambare chicho, bolkaru dekdo wari tu'gipa dongachim. Uamang maiko dake gro togen ine duk ong'beaha. Uko nike Me'enpa Rongdingpa—Gnawet Ginase, (Sangkni chipu) ka'sachake Jal'ang channe, boltong ane on'aha.

Me'gam Badakka Dambasu jal'angko male re'na skang pante rokrek me'a bal'ekrangna aganaha. Ruat nade ganoba, ganggu su sam chikoba jal'ango dechaknabe, boltongo dokchapnabe ine agane mihakna-

aha. Ukoara ruat chikode jal'ango den'chakbo, ganggu sursam chikode bolgongo dokchakbo ine knasretso-skaha. Indaken jal'ango boltongko male re'angtokmit-ingo pante rokrek, me'a bal'ekrang ruat chikako ake jal'ango den'chakaha. Unon Me'enpa Rongdingpa (Sangkni chipu) saknae gogoreng childareng katjok. Indaken Me'gam ritcha mande tasiba chiwario sripe sitok bon'tokjok.

Chio donggipa na'ma na'sarang, rou gagolrang mamatang a'gito Me'enpa Rongdingpani gogoreng childareng katana kentimange katbrangtokaha. Indaken Gonga Apikpa-Gongsa Bikkikpani namchiktangni ganding suengako, ja'anchinek jakanchinek nate auengako gangching satani, ki'me pe'ani éeng'kini bidualo sokmeni salakimo, gangching satani, ki'me pe'ani nangangaha.

Indakesa Gonga Gongsani namchiktanga, ja'ping chi'rongrikjok, sokme tappingrikjok. Gonga Gongsani namchiktangko Goldingme Miksime ine bimung mingachim. Ja'mano pari jelroraange jong'bu jonggitang ong-arangaha. Mamatang Gonga Gongsu uko namatna ine samra sampile namatna jotton ka'beoba manajah. Ja'mano Gonga Gongsu Dambo a'songona dobae, budu du'grak ga'tongko aro gonggitchakko ra'ange dokkning natkninge dapoara parirang nampilaha.

Ja'mano Dakgipa Ru'gipa, Silangko Silchi siknak-engjok, A'ako a'rae kanasijok, (Ro'ongko aro a'ako rakata) Goeraba sakachi dobo, Kalgra Kalkame a'ningchi napbo ine ge'etaha. Una goera sakachi doe katjok. Kalgra Kalkameba ua a'brini a'kolchi napmitingo naperapjae, ki-sangte satsade ro'ong pil'aha. Da'ona

kingking ua a'brío nikenga. Ua a'brikon d'ona kingking
Kalkame a'bri mingenga.

Jal'ango ruat den·chakjaode boltongo ganggu
su'sam dokchakjaode, Kalgra Kalkame Me'gam ritcha
mande tasiko Kalgra Kalkame dingoba keoba amja-
wachim.

Kalkame an'tangna ka sae dakgipako name sandi-
chenggija bobil dakpila.

Bilchrokna skang nichengbo.

GUK JO-ONGRANGNI ARO GIPINRANGNI BIMUNGRANG

A·chik pagitcham ma'gitehamrangni chasongo guk
ja'ong aro gipin gipin janggi gnanggiparangko bimung
minge jakkalrongaha. Uarangko an ching jakkalrongjaoba
urinate nangpara uarangko bang'gija seaha.

Gantini ma'gipako Aijsbe

Gukchruma'ko Noe.

Aslikma'ko Sime.

Mangkisangma'ko Kalme.

Randuma'ko Aneng Gilneng Skoteng.

Dopa wa'cheksiko Redingchi Balmatchi.

Makkreko Waek me'a Wachek pante.

Do·bakko Rut me'a Rubal pante.

Do·rengko Korekpa, Kabinpa, Ganggipok chidual.

Do·bokko Dukupa Samepa.

Ki'singko Tusing me'a Tume pante.

Ang keko Gopre me'a Gopae pante.
 Aringgako Gingbo Rengsin, Salo.
 Alik ba Alaringko Bokring me'a, Baling pante.
 Do·budokko Rengka Rengsin,
 Rengkok Renggeko Gingbo Salo.
 Sangkni Rudachiko Me·enpa Rongdingpa.
 Alabokko Chokareng, Gamincheng, Chengkalo,
 aro Ckengkalok.
 Do·kako Kakpa Manggisim, Dokapa Sakgisim.
 A·gilsak, mane—Pilte.
 Sagal, Aema—Dittema.
 Mikkama, Airokrak—Wachitoktak.
 Wal'a, Sre tong·gitchak—Gitok Warikkat.

SUSIME MA·ANI SIA

Susime ma·gipa wa'alko an'o chango dongmitingo
 Ruenchima Ruendamani siako knaenba ginde, wanti
 cha'e, mango dongpae waltu walsengpana ine re·ang-
 paha. Re·angmitingo ramao bolsok boldakna ine bolchu
 rango, mandal chidokko sol·ani repa ni bikap (Ganchi
 rikna bol sol·ani bolbikap)-o jagitdotmanaha. Uko
 Dakdame Rudame nike aganaha.

Aiao na·ade! Sia saachi re·miting domitingo
 ja·gitdotake, ja·gitdotmalja tottingmalja. Ua minga
 na·ade bimung mingtinga chatchi de·tinga, nang·na
 namjawa, na'a songchi re·angpilbo doangpilbo. Indiba
 Susime ma·gipa na'a bimung mingjee, bimang dakjee
 an·tangko uratgija dakode, na'a janggi sigen, jama
 bongenne ine sao sarap on'a gnang aganangjok.

Maina Babugama-Ranagama-koba Ruranchima Ruenda-
ma ine mingachim. Susime ma'gipakoba me'tramitingo
ua gitan bimung mingachim.

Indiba Susime ma'gipa songtangchi re'angpiljaha.
Ua ginde wanti dakako cha'pae mango mangtupae,
walsenge repa dongpaaha. Uno dongmitingo an'tangna
ong'nasienggipa obostako u'iahaoa bakkakan song-
tangona re'angpilaha. Noktangona sokarin ua Skal
Basu bangjangko mikkang Sona riprangko deanseng-
aha. Untal uni ki'sangni chitipja ran'jaha. Uni gimin
uko Miknatok Ki'sang chitok ine bimung mingjetaiaha

Wa'alko jako man'antal Susime ma'gipa be'en
ram'sisi ram'dengdenge Anchi joke saenba bilgri
ong'roroangaha. Ma'gipani saako sanna gita demechik
Susime A'ko wene chiko panne, samra sampile aanoba
namkalatna man'jae duk ong'beaha. Susimenei duk
ong'beaha. Susimenei duk ong'bee dongengako nike
Katchi Beari Dakdambe Rudambe aganaha. Aiao! na'a
Susime, nang'ko ruragipa Susime, malamgipa do'kime
ine mingsing minggama, Da'o nang' ma'gipani ram-
sisi ramdengdenge saengakon urijama? Nang'mara
Skal Basu Bangjangko Mikkang sona riprangko ba'e,
Sokdu sokkanesa be'en ram'sisi ramdengdengaba. Uasa
nang'mako cha'minok cha'minnienga ine aganangaha.

Uko knae Susime nokona bakkakan re'bae Skal
Basu Bangjangko Mikkang sona riprangko sae ma-
nenge nokoniko doke a'rikeaha. Wa'arja Silangma
Ajalma'ona katangaha. Aro unon pokpante jamsirenge
dongeaha. Susime jonggipa Wa'alko a'rikatani ja'mano

tuk ong'e ma'gipa sinti gogoe cha'gija-ringgija kalime siangaiaha.

Suame ma'gipani siram biapara Matchakol Marirang minggipa Mangaang a'songosa sia ine aganronga.

Indakasa A'chik pagitchamrang skang intalan sia saachi, gro a'selna re'nasio jagitdotode ba mande ba jillarang atchingchangode Asimalja ba namrongja ine aganronga aro bebe ra'a.

KA-MIKKENA

Walsao okkrigipa matcha mangsa song damsako re'pakangon, me'chikma saksani bi'satangko ba'e, tusi-china toptope mumuengako nokdechol gita nokning-oniko nikataha. 'Aiao! ua bi'sade angna nambegipa cha'ani ong'genchim da'nang,' ine matcha gisiktango chanchiaha. Bi'sani ma'gipa bi'satangko badita toptope mol'mole tusiatna jotton ka'a bisaba. bate batesa chrik chrike grapaha. Ma'gipa bi'sako 'jrip jrip tusingbo, na'a jripjaode, angade matchako okamate chikchina on'atgenne' ine ka'mikkenate aganaha. Bi'sara bilsignimang ong'ahachim. Matcha uko knae aganaha. 'Angnasa namjok, Mitesa angna pattipajok,' ine kusi ong'beaha Indiba bi'sa dontonggija grapaha. 'Aiao! bi'sa, angni bimungna ke'soani dongjasrang,' ine matcha chanchiaha.

'Na'a jrip jrip dongjachongmotode angade te'rik chike cha'srangchina on'atgen,' ine ma'gipa agantai-aha. Unon bi'sa graggija jrip jrip tom'tom dongaha.

Aiao i te'rik minggipan angna bate kenbatnigipa ongrakon, unasa bi'saba kenbate jriprir donga. Angni ka'dongsoade magnasa ong'aiaha. Te'rikara angnaba kenbatani ong'naba donga,' ine matchaba gipinchina re'angaba. Maina te'rikna matchaba kenbeaha.

Matcha game cha'gipa mande saksani a'bachir re'anskaha. Game cha'gipa mandeni matchuko chike cha'na ine nolningchi napangaha. Matchani nolningchi napangmitingon, matchuko cha'ue mona ine mande saksaba sangipinchiko napangskae, ian matchu ine chanchie matchani janggilo cha'ugipa mande gakataha. Maina andalbeani gimir uamang nikgrikjaha. Matcha bakan kenbeaha 'Te'rik minggipan angni janggilo gakataha,' ine chanchie rang'san a'palona ong'kate ta'rake kataha. Cha'ugipa mandeba name nioara mat-chude ong'ja, matchasa ine nikoara namen kenaha aro bakan bilone dongrikaha. Matcha janggiltango jrimani dongjahaoba tingbang nipil nichagija burung bolgrimchina katangaha.

Ka'mikkenataniara namgniba donga aro namgija bang'a.

JONGGE ARO TAMRE

Song damsao Jongge aro Tamre minggipa jiksesao rama re'baenggipa depante saksu dongachim. Uamang a'ba jamatalo donge a'ba gamachim.

Walsao mikka balwa ta'rakbee rakaha aro stilba bang'en onaha. Nok jamrangan be'su be'su dakpilaha.

Uamang kentokaha. Indakmiting ehachaon uamangni depante sikdekdekpile grapaha. Ma'a paa uko jripatna gita rokom rokom agane mol'molbeaha. Indiba bi'sa manigija grapaiachim Una uchi me'mang re'baenga, hudu hudana on'atgen, do'pona on'atgen, mongmana on'ataranggen ine rokom rokom agane ka'mikkenate aganoba, bi'sara on'tisaba dontongjachim. Ma'a paa, dekdo ong'pilaha aro maikon dakpilgnok u'isokjapilaha.

Unon pagipa bi'sako de'tome, nokdecholko oe, 'Ha matcha ia manigija grapgipa bi'sako rim'ang-srangbo.' Ine agane goata gita daksusuataha. Unon matchaba bukan bi'sako ra'soe, katangaha. Unon ma'a paade ku'wak jakwak dake nitatgrike grap manggarie, Sinti do'pilgime grape dongtokaiaha.

Matchako rikange sandinaba wal'mindik, unbaksa-naba balwa ta'rake rakmiting aro mikkaba jimbemit-ingchim. Matchaba noksamon chake dongengachim Balwa ta'rake balode, mikka jime waenba stil onode matcharangde manderangni nokkimaona ba noksam nokgilona katbae chakronga ine pagitcham ma'gitcham-rang aganronga.

Bi'sarang je ong'oba matchana, mongmana aro matburungrangna along ka'mikkenatna nangja aro den'ding, su'ding, dokding daknaba nangja. Basakoba mangsongchongmote dakna mangsongjaoba, kratcha'e mata bu'a, ineba gitichamgipa manderangni aganriting-ani gnang.

An'ching A'chikrang dedrang su'drangko to'achi, k'mikkenatanichi sason ka'rongbata. Indakesa an'chingni ka'donganirang komiroroangenga. Ka'pong ong'ani bang'batrorobaenga.

Uandahgipa bewalrangko an'ching ja'rikna nangja.

DANJONG

Badiaba song damsao Danjong minggipa mande saksa dongachim. Ua a'bani jamatdalo dongkame a'ba gamachim. Salsao a'jakra gamkario sam dikgipako gammitingo uni jaksi ge'sako bisigrak chipu suaha. Ua rang'san me'apa gitchamrangni aganako giksik ra'e an'tangni jaksi jekon chipu suahachim; uko sotaha. Bakan Danjong samko dokkninge pario dapaha. An'chiba tipaha.

Ua nokona re'ange neng'take on'tisa tusiaha. Mikrakahaon an'tangni jaksi chongdikko nie chanchiaha 'Angni Jaksi sottonggipara biapon dongkuengama? Anga biapona re'e nigen.' Ine agane biapona re'ange nieaha. Uni jaksi galanggipa biapon dongengachim. 'Ha, da'nang gose, angni jaksiara dongpaenga. Mai-dake angni jaksiko man'pilgnok, a'o angni jakside chong'dikdik nidik nisi dakaijok. Angko chipu sujaode indakeba ong'jawachim da'nang' Ine aganenba jaksiko ra'e niaha. Ja'mano ua jaksi chottomgipao sam dap-ra'e niaha. Ja'mano ua jaksi chottomgipao sam dap-ako oke galenba jaksiko apaan songe donskae niaha. Adita dongon be'en gimikchina biai chipangaha. Wal-tongsa tangari Danjong siaha.

Indaken bang'a manderang an'tangtangni dakgimin kamrangko namja ine nikeba ba u'ieba galgimin namgija dakbewalrangko dakpilaie ja'mano dukko man'bata.

Aganani gnang, *Wak a'dubekona re'angpila.*

O-BITESA

Gittim damsao o'bite, chawari, demechik, dedrang aro sudrang dongachim. O'bite budepa ong'beahani gimin, ja'a jakrang aro be'en gimikan moaha. Gol'dik channe re'paode kangkare koman simalgipa gita asongoa ja'skuan batpilachim Duk ong'beesa janggi tangpa-engachim. Sudrangko barik rodilpanaba man'pajaha Cha'na mangmangsa man'aiaha, gita ong'pilaiahachim. O'biteni kamrangko nike chawari chakchikangna neng'nikangaha. Ka'sae dakangnan sikangjaha. Sisrang-on una nambatgen ine chawari chanchivilaha.

Chawari o'biteko siatna gita kokchengko dal'e wataha. Chibimao rokanne ine aganenba o'biteko asongate, aro an'tangni depante dal'kalgipako rime chibimachina re'angaha. Chibimaona sokangoara dramo kokchengko donaha. Ontisa nengtakani ja'mano kokchengni rikgingo rim'e de'tommitingo depante nikenba sing'aha. 'Apa atchuko mai dakna amenga?' Pagipa aganchakaha. 'Agre budepa ong'beahani gimin sisrangchina chibimao galatna amenga.' 'Apa na'a ka'saninggijani kamko daknabe. Na'a dakode atchu gita budepa ong'beahaode, nang'koba kokchengo chipe ia chibimaon anga galsruskagen.'

Depanteni agangipa kattako pagipa gisiktango chanchie, gisik pile chichi galatgija noktangona ra'-bapile, siangona kingking ka'sae jakkalaha. Aro mamung dukkoba on-jaha.

An'chingoni bang-batan ma'a pa'a aro atchutang ambitangrangoni agre buchuma budepa ong'e amang-jahaode, nidika, ka'saninggija aro simsakgija dake jak-kalrongbea. Lakon an'ching gisik ra'na nangchongmota.

Na'a jeo toa. nang'koba ua apsanon toskagen, ba Na'a jedake uamangna dakmanaha, Nang'koba uagitan dakskako man'gen.

AGANME-APANIRANG BAK I

Aganme-apa A

1. A'gitoko cholasi saa, Sakchinara majal pina.
(Man'na ba gimaatna cholrangko daka)
2. Amak gita ma'gape, do'bak gita suait.
(Namana ba namgijana ong'oba watgalgija dakani.)
3. A'ko a'san o'kuja, Nokko noksaa rikkuja.
(Onate aganani ba chonike aganani ong'a.)
4. Amin-ana magapama, Snengana si'ditgenma.
(Ong'na amrongbreja.)
5. Alna brange, Sokna tengkie. (Cholgrimiting.)
6. Agananan ka'sara, Mikninan mikchara.
(Pilak kamkon namnika.)
7. A'tipsano daka, Chikongsano chiripa.
(Pilak kamrangon apsan nangrimgrika)
8. Atteba gitchiba bipong dongosa nama.
Mandeba jora ripeng ra'osa krara.
(Jika sea dongosa nama.)
9. Aninan chamenan ba'a chi'a, Nionan sarinan dina.
(Nanga ke'anan depante demechikko ba'a)
10. A'karokko man'jae a'raeko kita. (Dal'gipa rakgipa-
ko pa'jae mikchepako chonnika.)
11. Am'pak kancha nangrimja. (jikse meligrikja.)
12. Agano mitaka asongo dongtima. (Kakket ong'ako
mitino agana.)
13. A'keon a'matja, Ikgilon ku'tangja. (Onateba chon-
nikeba aganani ong'a.)
14. Achak wa'tok krusa, Do'bok paga amota.
(Sasti man'a)
15. Atta pari nia gita, Bikok de suaaa gita.
(Dakade dakja ba dakmikaia.)
16. Alabok na'tok nima. (Dakmika)

17. Aram gri goera goa (Mamung ong'jaoba gaora dea)
18. Attema wa'cheksinan ga'aka. (Dal'gipako chon-gipan ama.)
19. Adil mittugrika. (Dolgnichian dosi ong'a)
20. A'chi bame, jaksi chike. (Duk ba kratchaako man'a)
21. Amak deko aktete kata gita, Do·bok deko galchipa gita. (An'tangni jik deko, ba se deko gale seke kata.)
22. Am·bolba ja'sande ching'ja, Mandeba saksanderakja. (Mandeska baksa ba songaul noksul baksa melina nanga.)
23. Aganakon ra'ja, Kokkarengkon olja. (Skatang dakaigipa.)
24. An'tangan do·bok, An'tangan kilkok. (An'tangan gamgipa, An'tangan cha'gipa.)
25. Achak kore chamanjok, Wal'ja ga'tingdelmanjok. (Dosi dake kratcha'ako man'a.)
26. Ang'keba kolningode grong sachaka, Na'chiba sinasio ki'me taptapa. (An'tangna warachaka.)
27. A'gilsakko ki'sangchi donbo, Kurmongako mikkango ra·bo. (Pilakna skang ku·monggrike aro nangrime dongbo.)
28. A'chi bamchikope, Jaksi su·chokchoke. (Duk man·beani.)
29. A'chi bamchikope, Jaksi pe·rikkope. (Duk ba kratcha'ani)
30. Atte chio den'a gita, Jako omak bua gita. (A'sel ong'ana krae dongdika ba dongtoja.)
31. A'totko so'o a'mako kama, Do'sikko goo do·mako nanga. (Chonna ine dakachim indiba dal·bea a'selsa ong'a ba chona kam dal'a a'sel.)
32. Aratara sal jaroa, Gong'ara sal kan·dika. (Aratani aro bimchipani kam.)
33. Achakan sing·pilja Bi'sa desan kenpilja. (Agre songaulchi roa.)

Aganme-apa B

1. Bolchong agal gita, do'ka manggisim gita.
(An'tangko sole aro gipinkoba chonniike aganani.)
2. Bila jaka udare, ku'ba ranga balingre.
(Gipinko sole chonnikani aro an'tangko sole aganani.)
3. Bika a'dram be'e, mikchi chiwaringe.
(Duk man'bee kalimani.)
4. Bibalsa bibalaia bitede nangja, dimsa dimaia
bitchide dongja. (Kimbo dongbo inode kimja
kratcha'atnasa dakaia.)
5. Be'entangna kacha wate, an'chitangna wa'sing
sine. (An'tangko on'kangani.)
6. Balwa a'jakra baldapa, stil rongmisi ondapa.
(Dal'a duko ga'akchenga.)
7. Bu'suko bu'suskachi ota, Do'oko do'skachi kimala,
(Dengguuko dengguskachi man'a)
8. Bangal a'pal re'a.
(Dosko dongnua, sangipinchi mesoka.)
9. Brak me'gol jola matjol.
(Nama ba namja chanchigija dakpaia.)
10. Bilan jakan dongpaja, Ku'ba rangban tang'paja.
(An'tangko sole aganani.)
11. Bimang do'pinchep, sko kimkatek.
(Gipinko aro an'tangko solani.)
12. Bolchong agal be'en pil'oba, Mikkol dare chol-
choloba. (Kalimbeani.)
13. Be'entangko niroke, mikkantangko janie.
(An'tangko tarie rogipa.)

Aganme-apa C

1. Chonmitingo do-chokna dol'a, kuro siko bolgrona sol'a. (Chonmitingo chonnika dal'ahaoa gamchata)
2. Cha'na ino a'nama, Chuna ino mesenga. (Mamungnaba cholijaha.)
3. Chiningo ja'ga saa, Okningo wagam chaa. (Gimaatna, kratcha'atna ba nisina chol daka.)
4. Chachuran bokangjok, Salnangrang gomangjok. (Budepa ong'angengaha.)
5. Chame apa bola gipi. (Bilai bang'gipa budepa.)
6. Chidin midinja. (Seko mande ra'ja.)
7. Chidin midine. (Seko mande ra'a)
8. Cha'na ringna koksrong, Gamna rim'na aragong. (Cha'betbonggipa, gamnade aratgipa.)
9. Cha'an salo potturak cha'gnok, Sian salo kakkurak signok. (Mun'an salo cha'preta, dongjan salo dongdata.)
10. Chra mongting, Wa'ge ja'ting. (Maharini gisepo dal'batgipa mama ba ada.)
11. Chio su'o taljajok, Salo ramo ran'jajok. (Dakgimin dosiko gimaatna man'jaha.)
12. Cha'na ino mi gnang, dongna ino nokgnang. (Cha'na ringna kraen donggipa.)
13. Cha'gnia giso, Agangni kiro. (Cha'ade ringade bon'angaia, Agane rognide pangnan.)

Aganme·apa D

1. Doko janggil sagija bolbigil, Ino nachil songgija
waknachil. (Knachakgijagipa manigijagipa.)
2. Do·bima bitchi ringa gita, Mappu deminoka gita
(An·tangan an·tangko gimaata.)
3. Do·krusa elgimgim kimprasa bokdimdim.
(Man·e cha·gipa mandeni songgitcham.)
4. Do·do dorimit gita, rama bolbijak gita.
(Me·tra nitogipa ba daknanggipa.)
5. Do·kana chri mesoka gita. (Dakmike mesoka.)
6. Durubolna ba·a, Nokbichongna dina.
(Nok man·rikgnigipa demechik.)
7. Do·si do·pitna a·ba tua gita. (Jik aro se meligrikja.)
8. Do·bak gita susite, Amak gita rengkote.
(Sibo tangbo watgalja.)
9. Do·siko goo Do·mako nanga, A·totko so·o a·mako
kama. (Chona ine dakara dal·a a·selo ·gaaka.)
10. De·o salna soka Pino a·na gipa.
(Miteleba ba chonnikeba aganani.)
11. Do·gita ga·brite, wakgita jilrurue. (Bimchipani.)
12. Do·ko do·reng bala. (Mandeko matcha chika ba
jik ba se seke kata.)
13. Doka manggisim gita, A·ba bolotchong gita.
(An·tangko ba gipinko chonnike sole agane roani.)
14. Dileng do·mika, Chiru a·gata. (Simsakbeani.)
15. Do·gepko chio wata gita. (Nambó ba namjabo
dakrongao kusi ong·a.)
16. Doreng gita bilbrange, Aru gita gitchoe.
(Branga ba robranga.)

17. Duk chakgipara chekke, rasong man'gipara kokai.
(Gipinni duk chakgimino rasong cha ba man'a.)
18. Dongatangna simbrara, Kawatangna maringa.
(Jikgipa aro segipa ka-pakgrika.)
19. Do·ka mandal ringa gita, Matchu noko gaa gita.
(Kraja, nitoja ba ong·rongja.)
20. Din·ako sapake chaa gita, Cha·gijako cheke ringa
gita. (Bakbak ba rang'san dakaniara namja.)
21. Dim·ak nanggimin, Anggal ba·gimin.
(Skangnin dakgimal.)
22. Do·bakchil bitchi chi·a gita. (Kamrang tik ong·ja.)
23. Do·po de ba·a gita, Amak chera gita.
(Dingtangani gri.)
24. Den·na ino attetang, Kimna ino ma·detang.
(Ke·ja ba ma·drang ong·a.)
25. Do·rekko mikrimtipa gita. (Tol·pinike daka.)
26. Dimchang do·mesal gita, Bolgong matchak gita.
(Pante daknanggipa.)
27. Do·do do·rimit gita, Ragong bolbijak gita.
(Me·trako mitelani.)
28. De·e mesoka gita, Salna pinnika gita.
(Mesokjojoa.)

Aganme·apa E

1. Etalaba bebe, Ki·siaba ki·bebe.
(Tik ba bebe ong·a.)

Aganme-apa G

1. Gipinchi do'de gitek, An'tangchi ki'sing gitok.
(Gipinchide cha'a ringa, an'tangode dongja.)
2. Ge'a skang Bite ja'man. (Dakchengna nanga.)
3. Grongan a'mang nangja, Ki'mean samte ba'ja.
(Aratgipa ba an'tangko ba gipinko solani.)
4. Grongtangan mata, Ja'sitangan bu'a.
(An'tangchin a'sel ong'a.)
5. Gol'o jota gita, Rengsi sika gita. (Ma'drang
bang'jaoba, kurcholsan nangrimani.)
6. (Goerako katipe pala, Salgirako su'teke wata.
Mikkana salna aro sin'ana kengija bimchipani.)
7. Gando makkal pala. [Ra'bia.]
8. Gijipni balaba bal gitade ong'ja ma'detangni ka-
saade ma'gitade sokja. (Pilakni ka'saaba ma'gipani
ka'szako sokja.)
9. Ginnam. (Ripeng.) (Ripengska ba gam.)
10. Ginnambak. (Gamchatani ong'jaoba.)
11. Ga'akako wagata gita, be'sotako sokchua gita.
(Jik ba se sio on'rika.)
12. Gipinni dama dokana chrok me'sara, Jawani
meseng cha'ana ku'chi mitapa. (Indin katchapaia
namgnide dongja.)
13. Gorial mikchi ong'a. (Dakmike mesoka.)
14. Game su'e cha'naba agal saoreari, Ko'e ringna
inoba chia a'dubekari. (Arate pa'sikani.)
15. Gitok ma'sie, Ka'bak sosie. (Chu'onga gita cha'a
ringa.)
16. Garang gadang, misi bipang. (Pilak kamon tik
ong'ja.)
17. Gama gri jam, ku'monga gri kam.
(Ku'monga skang dangdika ja'man.)

Aganme·apa H

1. Hohoesa pakchara, Su·songesa wegara.
(Ku·choban ba krimkro dakani.)
 2. Hir, gando dakeni. (Ra·bia ba chonnikani.)
 3. Ha ang jaksi. (Rabia chonnikani.)
-

Aganme·apa J

1. Ja·panchi nanga Ja·ku chitangpila.
(A·te re·roroa.)
2. Jilla dal kujinama? Songa cha·kujanama?
(Tik ong manalia.)
3. Jang ki gara, Noksam mala. (Me·chikna ba gamna re·a.)
4. Jong·a kisika, Angke kolmutapa. (Dostangko dongnua.)
5. Ja·pang kinma roka, Kambe do·tekmea.
(Ning·o maiba a·sel donga.)
6. Jaksi rim·dinga, Ku o ku·manchia.
(Namgijana ku·monggrika.)
7. Ja·pang kala wea, Rike do·tekmea.
(Ning·o maiba a·sel donga.)
8. Jako ra·bite, ku·o ku·bite.
(Namgnina skina namnikgipa.)
9. Jaksamsachi asok chaka, Jaksamsachi gol·ok ra·a.
(An·tangnasan nama cholkosan am·aigipa.)
10. Jakpa peng·e nimana, Janggilate katmana.
(Chonnik onnikani ba kal·stapani.)
11. Ja·pingko bolgong niap, Jaksiko ki·gol pe·ap
(Detangna duk chakani.)

12. Ja·natangon kea bratangan bu·a. (An·tangni kamon duko ga·aka.)
 13. Jik dena, sia a·na china bon·a. (Jik dena kasa·ani kam.)
 14. Ja·gitote ja·mata, nigitoe miknapa. (Simsakgijanio an·tangtangan duko ga·aka.)
 15. Jagital jatengrako, Te·gisim anggal so·o. (Salko tik ka·grika.)
 16. Jika dea bobil, Ma·a noa ja·dil. (Namosa jik de, namjaode bobil.)
 17. Jakjipani gongbonga. Rim·brakani chi·bonga. (Dosna krae dai gama.)
 18. Ja·kimil dingsan moja, (Chonnike rabiani.)
 19. Ja·man chakgipa, Skang chilgipa. (Maharini gisepo chra dal·batgipa.)
 20. Jakasichi rikoma, Jakrachi sachaka. (An·tangni mangninasan dakaigipa.)
 21. Jripmitip gura katip. (Donchipa.)
 22. Jaksambalgnang. (Amsokja.)
-

Aganme·apa K

1. Kursiko bija bitchi, Okningo matcha bisi. (Nampinike cha·minoka.)
2. Ku·ko wangaia, Jakko tom·aia. (Cha·nade am·a kamnade arata.)
3. Kilte akaia, Waring moaia. (Kimkam dongkamgija ong·siate ronasa am·aia.)
4. Kimacholko kime, donga cholko donge. (Je mahariko kima, ua apsan maharikon donga.)
5. Kiman biding, ka·an biding. (Apsan mangsongani)

6. Kiman biding kimosa, dongan biding dongosa.
(Mangoangani apsan.)
7. Katesa joka, gelesa tanga. (Nangija ong-gnioni gelna nanga.)
8. Ka'merang mesoka, Ja'pa ga'an tektaka. (Ka'a nangchaksoako chakna amsoja.)
9. Ka'abesa ka'gimal. (Ripeng daggimin.)
10. Ka'ara amja, bilara sokja. (Daktoja ba dakdika.)
11. Kote ka sebrea. (Jik ba se on'songa.)
12. Ki'na siko ki'gol pe'a. (Nangan salosa dakgitikaia.)
13. Kamalba namja, anggalba goa. (Dakdilgipaba namja ja'rikgipaba apsan.)
14. Kangkri a'jong kanga. (Beng'a dake an'tangba dakpaia.)
15. Kawate ku'dikgila. (An'tangni signiko agane on'a.)
16. Ku'simike man'ako, jakpa doke wata.
(Altue man'ako, nengrae gimaata.)
17. Kni matram pemiting, nokna a'na sin'miting.
(Bilsi re'angengon man'e cha'a.)
18. Komili niap cheltongo, bolgong channap ja'pingo
(Detangko chelo done tuata; ja'pingo asongate ki'ata.)
19. Koma pua korera. (Jikgite ra'a.)
20. Ki'sangba namja, jakba tik ong'ja.
(Tilekrakgipa aro cha'urakgipa.)



Aganme-ap M

1. Mia misi wa'pango, ranga gama biltango.
(Bimchipani namgni.)
2. Mikka bitchi ringe, Ruat nade gane.
(Bimchipani.)

3. Mia Misi ga'gong, mande akan sajong.
(Miba misiba ga'gongosa raka, mandeba mande-
skao pangchakna nanga.)
4. Ma'na no'na ok, Jikna dena kok. (Ma'a nochi
re'ode cha nasa jik denade man-banasa.)
5. Ma'na nona manggol, Jikna dena ki'gol. (Ma'na
nona raka, jikna dena nom'a.)
6. Mikkangchi doko janggilchi sa, janggilchi doko
mikkangchi sa. (Nangsamgnia, ba ma'drang apsan
ong'aiani gimin engtoja.)
7. Maran ja'sku tangchaa gita, Te'sok noksurio wegae
gita. (Sisparangoni brange ja'mano mande ong'para.)
8. Mikgil jamgop pina, ki'sang medop daka.
(Me'chikko solani.)
9. Malamgipa do'kime, Ruragipa Susime. (Maiba tik
ong'gimin kamko sakgipin pengpange gimaata.)
10. Marang starang, sua sute. (Kragijagipa kam.)
11. Mande ine ino game sue cha'ja, Achak ine
mingnara ki'me chaja. (Mandeni bewal gita dakja.)
12. Makkre me'gong nima. (Dakmike mesoka.)
13. Mikkol dare cholchola, bolchong agal be'en pil'a
(Agre kur'dimduga.)
14. Mikron miksong sala, Peteng bora bita.
(Sibokanga.)
15. Mangrepaka. (Sigipani me'mang re'pake siboka.)
16. Maljuri ja'mejola. (Nokjangchio sigipako dona.)
17. Mepal dine, chite gate. (Sena me'chik cha'senga.)
18. Mikkang wal'kusi nanga, Bimang dim'ak sima.
(Jikgipa ba segipa gipinko tileka.)
19. Mikkang gachi napmanjok, Ku'rang pale cha'man-
jok. (Jik ba se dongmanjok.)
20. Matma skoko done milai pia. (Man'ani koako
man'dapdapna am'a ba mikbokraka.)

21. Mappu bitchi bama gita. (Kragija daka.)
22. Makkre pari nia gita. (Apatkon daktaitaia.)
23. Miknagengchi nia, penagengchi doka.
(Nina sikja ba miknenga.)
24. Matcha matchu chikmano, gohali do'ga chipa.
(A'sel ong'mano, namatna jotton ka'a.)
25. Mongmako ga'changbata, chibrimo ja'gitota.
(Dal'beako dakna amoba, chongipako amja.)
26. Matchu mattekön nachil rae, ki'me sote jilla ba'a.
(Changsa changgniko ke'ma ka'a.)
27. Mandekode uia, bimungkode man'ja. (Chu'onga gita
saki man'ja.)
28. Mepalsan cha'a, chitesan ringa.
(Jik aro se nangrima.)
29. Mikchi mikkema, jakchi jakjipa.
(Namgijana ku'monga.)
30. Mikchi mikjapgrika, jakchi jakjipgrika.
(Namgijana ku'monga.)
31. Matcha mikrono. (Dakbewal ong'ja.)
32. Mera pasadape. (Til'eka ba an'chara.)
33. Mat an'chi pila gita. (On'tiprak.)
34. Mikka skal, ja'a kadal. (Nama ba namja dakaia.)
35. Mikrimtipe ja'mejole. (Sigipako tarie pujua.)
36. Miktuat gingtuatja. (Dondikgija sandia.)
37. Mikjumangchi agana, jajumangchi agana.
(Sigimin mande jumangchi agana.)
38. Mikkangchi ajak, ajak, bimang do'on, do'on.
39. Mikkang done, kuri sonne. (Skang wate re'a.)
40. Matcha helbikbika, do'reng gakasia.
(Kenani ba nangbeani sal.)
41. Mikamak niangengjok, ja'kuak ba'angengjok.
(Budepa ong'roroangbeengjok.)
42. Me'chik songga batode, sa'am rimol ra'bite re'na
nanga. (Su'aniko su'pana, song'aniko song'pana
nanga.)

KU-JIKSE

- Pakma nachil cha— } Noktangni srikerik ong-gipa katta ba kamko gipinchi knaanga.
- Rang'ki rang-dang } Kur'sikba aro kamba gipinrang baksa apsan ong'rongja.
- Mikmarang ga pamarang cha } Mandeni bewalo maiba a'sel ong'ani chin donga.
- Balnanga. — Maiba samrangni bibalni bibako man'e saa.
- Okmangraka okmittanga. } Okkriana on'tisa cha'aniko cha'a.
- A-rang-a'dang, Misi-bidang. } Mamungchi ong'gijagipa.
- Ka'spea-Rang'spea Spea. } Gisikni aro bilni neng'nikbeani kamko matchota.
- Am'pok ja'groo asonge } Skangni chasongo chra
Pakma do'deo dengdale } tang dal-gipako mande
ba dandane. } ra'ani.
- Jikgesea-degesea — Noktango jik aro ae kajia ong'a.
- An'min-jakmin, } Nangbegipa kamni gimin
An'minpila-jakminpila, } nengbee chanchigrikani.
An'minpile-jakminpile. }
- Nisangwala-Niguala — Nikchanga.
- Nikjagringa-Nijagringa. — Maibani bimangko nisreta.
- Nimikbrang-A'mikbrang } Name sandie amjae
Nimikbranga-A'mikbranga. } nikja.
- Nisket-Nisket, } Gipinko nisreta.
Nisketa-Nisketa. }
- Jakaarang — Je bosturangkoba nosto ong'atranga.
- Nirongreta-nikrongreta. — Miksongako gisik nangja.

- A'ograng-chiograng. }
 A'mikbrang-chimikbrang } Gisik nanggija dakani kam.
- Nibingbang-ra'bingbang. }
 Nibingbanga-ra'bingbanga. } Do
- Do'rama sala, }
 Ari ma'ata. } Arijoljol misi goa ba sata.
- Jet korang — May jao mikka wagija sal rakchanga.
- Okama-intila, }
 Gosala-okama. } Bimung minge okama.
- Me'mang mikkang pa'a }
 Me'mang mikkang pa'a gita. } Bilsi ru'utbeani ja-
 mano gronggriктаia.
- Jumang-dalmang, }
 Jumangchi-jakrachi. } Jumangba nikja, mikgitaloba
 dakja.
- Nangeja sokeja. — Bak nangepaja.
- Ninawanga-dakbingbanga. {
 { Dakpaani aro, nipaani
 ong'jaoba daka.
- Korokpila-achokpila, }
 Korokpile-achokpile. } Bimchipdugae bilgri ong'pila.
- Senggipa-matgipa. — Rasong on'ne aganani ba solani.
- Tengtoe gojrone — Chakchikbeani.
- Bi'sa gita. }
 Bi'sako gita. } Mande ra'e aganani ba ge'etani.
- Ge'ete tikkonge — Mandeko aldue jakkalani.
- Nina misilmisil }
 Agana kratkrat, } Ninaba aro agannaba nimalgijani
 aro aganmalgijani ong'a.
- Mat-mese balrikga gita {
 { Bi'sarangni on'tiprak kam
 ka'baani.
- Achakna menggonade }
 batpajok. } Chongipa bi'sarangko chon-
 gipa dakgniko dakata.

Gisik wata-roē sala,
Ja-singenok enokna, } Panteko de-mittelani.
Ki-me gonggot gonggotna, }

A-keja a-matja — Aratgipa.

Arata-Nengrara — Kam ka-gijagipa.

Al salsoaibo, } Segipa man-na namgniko
Chikong doksoaibo. } dakani.

Mepalsan cha-a, } Jik aro se ka-sagrikani.
Chitisan ringa. }

Am-pak kancha raja, } Jik aro seni gisepo nang-
Biap bicham apsaija. } ringrikgijani.

Ku-rakgipa-wa-sagipa — Bil man-gipa.

Mande mingja-birong chanja } Mande ra-paja ba
mingpaja. }

Mande minga, } Mande ra-a ba mande minga.
Birong chana. }

A-bidingo niwate adil sikata, } Aratgipa kursik
Matchok grongo gakate } gam-aigipa.
ang-ke kotata. }

*** *Ku'jiksemi mangsonganiko ma'siatna neng-beani
ong-a. Maina a'sel ong-a obostarang gitasa agane jak-
kalronga. Jeko seaha mesokatanisan ong-a.*

SADUGITTAM

Badiaba gittim damsao sadusa sakgittam mande-rang dongachim. Uamangara namen aratchibonggipa-rang ong-tokaiachim. Nokrik nokdaknaba changtokjachim Alamala jamdapgita ku'geppep rikesa jikdrang dedrang-ko cha'dil dongdilaiachim. Sakgipinrangosa kam ka'e cha'dil dongdiltokaiachim.

Indaken da'nang dedrangara oktongaisi daktokai-achim. Be'en bimangrang agre ramdugaani giminan guasurangkon channa man-pilachim. Nokaul songaulni me-apaskarangni ku'sikki ku'patie on-parangkoba kna-chaktokjachim. Indaken uamang adita bilsirangna chakchike dongahaoba amchakteljaha.

Salsao sadugittam sruksruk brangarange sidim-srangna melae tik ka-arangaha. Indaken uamang jikdrang dedrangna uiatgija srik srik re-angtokaha, Adita chel'e re-angon, bol salakkimo bu'depa saksani asonge dongengako nikaaha. Budepa uamangko nika bachinasa re-angtokenga ine singaha. Chingade si-dimnasa re-enga ine aganchakaha.

Atcha, na'simang sidimna re-engode ianoni adita re-angon, ramasamo chagipa dal-begipa gitding pang-sako chisamo nikgen. Unona sokahaon bol ja'pango on'tisa re-angon maibako nikaegen ine aganataha. Sadugittam unoni re-angtaiaha. Adita re-angon uamang chisamo chagipa gitding bolmako nikaebebeaha. Aganata gita ja'pangona on'tisa re-angon basing silko cho'e bikote ra'aha.

Uamang basingko biap namaona ra'ange kingprake nioa tangka nike jagokmappitokaha. Sadutang dal'gipa aganaha. An'ching tangkako apsangrik suale ra'na skang cha'eheng ringchengesa sualna gita haowa adita chel'gipa songoniko cha'aniko sandie ra'echina sadu chongipako watatnama ine aganon manitoke gongchikung tangkako on'e watataha. Sadu chongipaba re'angbebeaha.

Uni re'angahaon sadugni tangkarangko sakgnisan suale rana chanchirikaha Sadu chongipa cha'anirangko an'chingna donmitingo rangsan chawate boltongchi koktrope siatchengna. Uni simanosa cha'e ringe apaan suale paltangtangko ra'e songtangchi re'pilna ine tik ka'e an'tangtangna boltongko sote nichaksoaha.

Sadu chongipaba songona sokange mi bijakrangko sandie breaha. An'tangde paltangko okkae songon cha'aha. Sadu sakgnini palko ra'e re'bamitingo rama-samo dokkan ge'sa chonako nike mese bisi pala dongama ine singon donga ine aganchakaha. Tangka gonggnichi mese bisiko bree re'baaha. Rama tongsona sokon, tangka gimikkon saksan mangopna sike sadugnini mi bijakrango name brine re'baaha. Tangka gimikkon saksan mantokgnok ine chanchie kusi ong'e re'bae sadugnini, dongramona sokbae, na'simangni palko cha'chengbo. Angade songon cha'bamanjok ine agane mi bijakko a'o donmitingon, rangsan chagrope sadugnian manggottangchi dokkroptokaha. Da'nang, sadu, chongipade biapon chikkiye sisrangaha. Mangsongako, chu-sokatna man'ahani gimin tangkarangko sualna skang kusi ong'e mikkanggrike mi bijakrangko

engtoke ch'aha. Adita ch'aragon be'eno bisi chip-
angahaon ganggile sadugniba sisha Uamangni agana
gitan sadugittam apaan sidimbebeha.

*Indake a'sel ong'ahon, matholtangon gipua, jagatangen
hea ine aganronga.*

TONGTE

Tongteni jatara an'ching mandeni jat gitan ong'a
ina. Indiba bi'sa bakgitchakrang gita ong'aia. Ja'bi'pil
ga'esa re'a, Mikkangchi ja'mik, janggilchisa ja'srang
ong'skara. Anga an'tangba an'chengoniko nikaha.
Tongterang manderangni jilla matchu, do'bok aro
manderangkoba dongnuna changbea ine agana.
Indakakon Tongte ba te'teng dinna ine aganronga.

Skangni chasongo song damsani me'chik bi'sa
bilsa chignimangaha. Uko nikjae ma'a paa aro bak-
drang matchan chikjokma, mongman dokjokma, bugan
ra'jokma, ine ronggrim, bolgrim aro chibimarangoniko
grape okame amtokbeoba man'jaha aro mamung
chinrangkoba man'jaha. Ja'mano songgimik salgittam-
na kingking wal sal ambeoba man'jaha. Ua songni
mande gitcam budepabegipa bi'sani ma'a paana
sasamko songe rimolchi su'dikdike nibo ine aganaha.
Una dake nibebeoa, adita ru'utani ja'mano me'chik
bi'sa noktangona re'baaha. Uko niksoe ma'a paa aro
bakdrangrang aro songgimikan kusi ong'bee chu ringe
wak doke cha'e ro'aha.

Me'chik bi'sa indake aganaha. Nraimangni angko
amengako anga niktokaiachim. Indiba k'asik aganna

man'ja. Indako angko donumitingo Tengterang krek inako cha'genma, dip inako cha'genma? ine angko singronga, Krek inako cha'gen ine aganoa an'cheng aro rongkrek bringiminkosa ra'bae mikkango done ha chabo ine agana. Una anga iakode cha'na man-jawa dip ingipakosa ra'babo ine aganoa ta'jong ritgimin gita nom'ako ra'bae on'rongaha. Jensalo sasam sur'dikdikako knaha, unosa nang'ni ma'a paa okamat-engjok re'angboha ine agane watataha.

Tongteni gimin agandapani da'ororoni chasong damberang aro mikkangchini chasongrang bebe ra'bo rajabo chasong gitcamrangni aganritingrorobanikosa knapae sepasan ong'aia. Pilaknan chasong gita ong'aha aro ong'angkugen.

Tongte bi'sarangni grapanirangba an'chingni bi'sa bakgitcakrangni grapa gita hinga hinga grapara ine agana. Aro bi'sarangko tusiatnaba toptope hing hing inpara ina. Skangni chasongrangode, burungrangoniko tararangko cho'oba ta'a minarangkoaba man'a ine agana. Ukon tongte rita ine agantoka.

A'chik songni badiaba badiaba biaprango Tongterangni dongram a'kolrang ba rongkolrang dongenga. Uarangkoa tetengkon ine agantokenga. Turaoba Hawakhana a'brio tetengkol minggipa a'kol dongenga.

8700

11.4.96

Sui